

摘藻堂四庫全書薈要

經部

欽定四庫全書薈要

經部

左傳注疏卷五

詳校官原任侍講臣王燕緒



欽定四庫全書薈要卷一千一百二十一

經部


春秋左傳注疏卷五

起桓公三年盡六年

晉杜氏注

唐陸德明音義

孔穎達疏

 經三年春正月公會齊侯于贏注經之首時必書王明  
此歷天王之所班也其或廢法違常失不班歷故不書

王嬴齊邑今泰山嬴縣音義

經三年正月從此盡十七年皆無王唯十年有王傳

以為義或有王字者非嬴音盈

疏注正義曰桓公元年二年十年十八年凡四年於春有王九年春無王無

月其餘十三年雖春有月悉皆無王穀梁傳曰桓無王其曰王何也謹始也其曰無王何也桓弟弑兄臣弑君

天子不能定諸侯不能救百姓不能去以為無王之道  
遂可以至焉耳元年有王所以治桓也二年有王正與  
夷之卒也十年有王正終生之卒也十八年書王范甯  
注云此年書王以王法終治桓之事先儒多用穀梁之  
說賈逵云不書王弑君易祊田成宋亂無王也元年治  
桓二年治督十年正曹伯十八年終始治桓杜以正是  
王正歷從王出故以為王者班歷史乃書王明此歷天  
王之所班也其或廢法違常失不班歷則諸侯之史不  
得書王言此十三年無王皆王不班歷故也劉炫規過  
云然天王失不班歷經不書王是乃國之大事何得傳  
無異文又昭二十三年以後王室有子朝之亂經皆書  
王豈是王室猶能班歷又襄二十七年再失閏杜云魯  
之司歷頃置兩閏又哀十三年十二月螽杜云季孫雖  
聞仲尼之言而不正歷如杜所注歷既天王所班魯人  
何得擅改又子朝奔楚其年王室方亂王位猶且未定  
諸侯不知所奉復有何人尚能班歷昭二十三年秋乃

書天王居于狄泉則其春未有王矣時未有王歷無所  
出何故其年亦書王也若春秋之歷必是天王所班則  
周之錯失不關於魯魯人雖或知之無由輒得改正襄  
二十七年傳稱司歷過再失閏者是周司歷也魯司歷  
也而杜釋例云魯之司歷始覺其謬頓置兩閏以應天  
正若歷為王班當一論王命寧敢專置閏月改易歲年  
哀十二年十二月螽仲尼曰火猶西流司歷過也杜於  
釋例又云季孫雖聞此言猶不即改明年復螽於是始  
悟十四年春乃置閏欲以補正時歷既言歷為王班又  
稱魯人輒改改之不憚於王亦復何須王歷杜之此言  
自相矛盾以此立說難得而通又按春秋經之闕文甚  
多其事非一亦如夫人有氏無姜有姜無氏及大雨霖  
虜咎如潰之類也此無王者正是闕文耳今刪定知此  
不書王非是經之闕文必以為失不班歷者杜之所據  
雖無明文若必闕文止應一事兩事而已不應一公之  
內十四年竝闕王字杜以周禮有頒告朔于邦國都鄙

以有成文故為此說但齊桓晉文以前翼戴天子王室雖微猶能班厯至靈王景王以後王室卑微厯或諸侯所為亦遙稟天子正朔所以有子朝之亂經仍稱王不責人所不得也猶如大夫之卒公疾在外雖不與小斂亦同書日之限然則司厯之過魯史所改據此而言有何可責劉君不尋此旨橫生異同以規杜過恐非其義也

夏齊侯衛侯胥命于蒲注申約言以相命而不軟血也

蒲衛地在陳留長垣縣西南音義

約如字又於妙反軟所洽反垣音袁

六月公會杞侯于郕

秋七月壬辰朔日有食之既注無傳既盡也厯家之說

謂日光以望時遙奪月光故月食日月同會月奄日故

日食食有上下者行有高下日光輪存而中食者相奄

密故日光溢出皆既者正相當而相奄閼疏也然聖人

不言月食日而以自食為文關於所不見疏

注正義曰食既者謂

日光盡也故云既盡也月體無光待日照而光生半照  
即為弦全照乃成望望為日光所照反得奪月光者歷  
家之說當日之衝有大如日者謂之閼虛閼虛當月則  
月必減光故曰月食張衡靈憲曰當日之衝光常不合  
是為閼虛在星則星微遇月則月食是言日奪月光故  
月食也若是日奪月光則應每望常食而望亦有不食  
者由其道度異也日月異道有時而交交則相犯故日  
月遞食交在望前朔則日食望則月食交在望後望則

月食後月朔則日食交正在朔則日食既前後望不食交正在望則月食既前後朔不食大率一百七十三日有餘而道始一交非交則不相侵犯故朔望不常有食也道不正交則日斜照月故月光更盛道若正交則日衝當月故月光即滅譬如火斜照水日斜照鏡則水鏡之光旁照他物若使鏡正當日水正當火則水鏡之光不能照日之奪月亦猶是也日月同會道度相交月揜日光故日食日奪月光故月食言月食是日光所衝日食是月體所映故日食常在朔月食常在望也食有上下者行有高下謂月在日南從南入食南下北高則食起於下月在日北從北入食則食發於高是其行有高下故食不同也故異義云月高則其食虧於上月下則其食虧於下也日月之體大小正同相揜密者二體相近正映其形故光得溢出而中食也相揜疏者二體相遠月近而日遠自人望之則月之所映者廣故日光不復能見而日食既也日食者實是月映之也但日之



所在則月體不見聖人不言月來食日而云有物食之以自食為文闕於所不見也

公子翬如齊逆女注禮君有故則使卿逆疏

注正義曰天子尊無

與敵不自親逆使卿逆而上公臨之諸侯則親逆有故得使卿八年祭公逆王后于紀傳曰禮也是當使人天子不親逆也襄十五年傳曰官師從單靖公逆王后于齊卿不行非禮也是知天子之禮當使卿逆而上公臨之也禮記哀公問曰冕而親迎不已重乎孔子對曰合二姓之好以繼先聖之後以為天地宗廟社稷之主君何謂已重乎此對哀公指言魯事是諸侯正禮當親迎也莊二十四年公如齊逆女正明不為之傳以其得禮故也文四年逆婦姜于齊傳曰卿不行非禮也以卿不行為非禮知君有故得使卿逆也九月齊侯

送姜氏于謹注謹魯地濟北蛇丘縣西有下謹亭已去

齊國故不言女未至于魯故不稱夫人音義

謹呼端反蛇以支反

公會齊侯于謹注無傳夫人姜氏至自齊注無傳告於

廟也不言輦以至者齊侯送之公受之於謹

冬齊侯使其弟年來聘

有年注無傳五穀皆熟書有年疏

正義曰年訓為稔謂歲為年者取其歲穀

一熟之義故禾稼既收農功畢入以其歲豐於常故史書有年於策此書有年宣十六年書大有年穀梁傳曰五穀皆熟為有年五穀大熟為大有年杜取穀梁為說其義亦當然也周禮疾醫以五穀養病鄭玄云五穀麻黍稷麥豆即月令五時所食穀也賈云桓惡而有年豐異之也言有非其所宜有案昭元年傳曰國無道而年

穀和熟天贊之也是言歲豐為佐助之非妖異之物也  
君行既惡澤不下流遇有豐年輒以為異是則無道之  
世唯宜有大饑不宜有豐年非上天祐民之本意也且  
言有不宜有傳無其說釋例曰劉賈許因有年大有年  
之經有鵲鵲來巢書所無之傳以為經諸言有皆不宜  
有之辭也據經螟螣不書有傳發於魯之無鵲鵲不以  
有字為例也經書十有一年十有一月不可謂不宜有  
此年不宜有此月也螟螣俱是非常之災亦不可謂其  
宜有也

傳三年春曲沃武公伐翼次于陘庭韓萬御戎梁弘

為右注武公曲沃莊伯子也韓萬莊伯弟也御戎僕

也右戎車之右疏

注正義曰武公莊伯子韓萬莊伯弟世本世家文也周禮戎僕掌馭

戎車戎右掌戎車之兵革使故知御為戎僕右是戎車之右也

逐翼侯于汾隰注汾

隰汾水邊音義

汾扶云反汾水名下濕曰隰

疏

注正義曰釋例曰汾水出太原故汾

陽縣東南至晉陽縣西南經西河平陽至河東汾陽縣入河爾雅釋地云下濕曰隰知汾隰汾水邊也

驂絰而止注驂駢馬音義

驂七南反絰戶疏注正義卦反駢芳非反疏曰說文

云駢驂旁馬是駢驂為一也初駕馬者以二馬夾轅而已又駕一馬與兩服為參故謂之驂又駕一馬乃謂之駟故釋文云驂駕三馬也駟一乘也兩服為主以漸參之兩旁二馬遂名為驂故摠舉一乘則謂之駟指其駢馬則謂之驂詩云兩駟如舞二馬皆稱驂禮記稱說驂而賄之一馬亦稱驂是本其初參遂以為名也驂馬在衡外挽勒每絰於木由頸不當衡故也名駢者以駟馬有駢駢之容故少儀云駢駢翼翼

是也夜獲之及藥共叔注共叔桓叔之傳藥賓之子也

身傳翼侯父子各殉所奉之主故并見獲而死音義

共音恭注同殉似俊反

○會于羸成昏于齊也注公不由媒介

自與齊侯會而成昏非禮也音義

介音界

疏

注正義曰此成昏謂

聘文姜也詩刺魯桓公不能禁制文姜云取妻如之何匪媒不得既曰得止曷又極止言桓公以媒得文姜此云不由媒者公親會齊侯必無媒也詩舉正法以刺上傳據實事以解經故不同耳○夏齊

侯衛侯胥命于蒲不盟也○公會杞侯于郕杞求成

也注二年入杞故今來求成○秋公子翬如齊逆女

修先君之好故曰公子注昏禮雖奉時君之命其言

必稱先君以為禮辭故公子翬逆女傳稱修先君之

好公子遂逆女傳稱尊君命互舉其義音義

好呼報反注同

疏

注正義曰公子遂逆女傳言尊君命是奉時君之命也此言修先君之好是稱先君為辭也翬遂俱

是逆女傳文各言其一是互舉其義昏禮納采辭曰某有先人之禮使某也請納采其納徵辭曰某有先人之禮使某也請納徵是男家辭也主人醴賓辭曰子為事故至於某之室某有先人之禮請醴從者是女家辭也彼士禮也故稱先人若諸侯則稱先君以此知其言必稱先君以為禮辭

齊侯送姜

氏非禮也凡公女嫁于敵國姊妹則上卿送之以禮

於先君公子則下卿送之於大國雖公子亦上卿送之於天子則諸卿皆行公不自送於小國則上大夫送之注齊侯送姜氏本或作送姜氏于謹公子則下

卿送公子公女疏

正義曰昏以相敵為耦先以敵國為文然後於大國小國辨其所異

姊妹於敵國猶上卿送之於大國則上卿必矣且姊妹禮於先君不以所嫁輕重雖則小國亦使上卿送也於小國則上大夫送之文承公子之下謂送公子非送姊妹也周禮序官唯有中大夫無上大夫也禮記王制曰諸侯之上大夫卿鄭玄云上大夫曰卿則上大夫即卿也又無上大夫矣而此云上大夫者諸侯之制三卿五大夫五人之中又復分為上下成三年傳曰次國之上卿當大國之中中當其下下當其

上大夫小國之上卿當大國之下卿中當其上大夫下當其下大夫是分大夫為上下也

○冬齊

仲年來聘致夫人也注古者女出嫁又使大夫隨加

聘問存謙敬序殷勤也在魯而出則曰致女在他國

而來則摠曰聘故傳以致夫人釋之疏

注正義曰經書來聘傳言

致夫人是行聘禮而致之也故知使大夫隨加聘問特所以存謙敬序殷勤也其意言不堪事宗廟則欲以之歸也成九年季孫行父如宋致女與此事同而文異故辨之云在魯而出則曰致女在他國而來則摠曰聘是詳內畧外之文傳嫌其不同故以致夫人釋之○芮伯萬之母芮姜惡

芮伯之多寵人也故逐之出居于魏注為明年秦侵



芮張本芮國在馮翊臨晉縣魏國河東河北縣音義

芮如銳反國名惡鳥路反翊音翼

疏

注正義曰地理志云馮翊臨晉縣芮鄉故芮國也河東郡河北

縣詩魏國也世本芮魏皆姬姓尚書顧命成王將崩有芮伯為卿士名諡不見魏之初封不知何人閔元年晉獻公滅魏芮則不知誰滅之

經四年春正月公狩于郎注冬獵曰狩行三驅之禮得

田狩之時故傳曰書時禮也周之春夏之冬也田狩從

夏時郎非國內之狩地故書地音義

狩手又反夏疏注戶雅反下同

義曰冬獵曰狩爾雅釋天文也易比卦九五王用三驅失前禽鄭玄云王者習兵於蒐狩驅禽而射之三則已

法軍禮也失前禽者謂禽在前来者不逆而射之旁去又不射唯背走者順而射之不中則已是其所以失之用兵之法亦如此降者不殺奔者不禦皆為敵不敵已加以仁恩養威之道是說三驅之事也狩獵之禮唯有三驅故知行三驅之正禮得田獵之常時故傳曰書時禮也善其得時明禮皆無違矣周之春正月建子即是夏之仲冬也周禮大司馬仲冬教大閱遂以狩田是田狩從夏時也釋例曰三王異正朔而夏數為得天雖在周代於言時舉事皆據夏正故公以春狩而傳曰書時禮也隱五年公矢魚于棠傳曰言遠地也僖二十八年天王狩于河陽傳曰言非其地也舉地名者皆言其非地故知此即非國內之狩地故書地也若國內狩地大野是也哀十四年傳曰西狩于大野經不書大野明其得常地故不書耳由此而言則狩于襍蒐于紅及比蒲昌間皆非常地故書地也田狩之地須有常者古者民多地狹唯在山澤之間乃有不殖之地故天子諸侯必

於其封內擇隙地而為之僖三十三年傳曰鄭之有原  
圃猶秦之有具圃也是其諸國各有常狩之處違其常  
處則犯害民物  
故書地以譏之

夏天王使宰渠伯糾來聘注宰官渠氏伯糾名也王官

之宰當以才授位而伯糾攝父之職出聘列國故書名

以譏之國史之記必書年以集此公之事書首時以成

此年之歲故春秋有空時而無事者今不書秋冬首月

史闕文他皆放此音義

糾居反疏

注正義曰周禮天官有大宰小宰宰夫知宰是

官也傳言父在故名知伯糾是名自然渠為氏矣周禮  
大宰卿小宰中大夫宰夫下大夫未知伯糾是何宰也

貶之乃書名則於法當書字但中下大夫例皆書字則此宰高下猶未可量故注直言王官之宰不指小宰宰夫慎疑故也詩稱濟濟多士書戒無曠庶官為政有三擇人為急王官之宰當以才授位今其父居官而使子攝職是王者輕侮爵位遭人則可故書名以譏之糾之出聘事由於王而貶糾者王不應授糾糾不應受使二者俱有其過貶糾亦所以責王如宰咺之比也春秋編年之書四時畢具乃得為年此無秋冬知是史闕文也舊史先闕故仲尼因之何休膏肓以為左氏宰渠伯糾父在故名仍叔之子何以不名又仍叔之子以為父在稱子伯糾父在何以不稱子鄭箴之云仍叔之子者譏其幼弱故畧言子不名之至於伯糾能堪聘事私覲又不失子道故名且字也鄭氏所箴與杜同云伯糾名且字非杜義

傳四年春正月公狩于郎書時禮也注郎非狩地故

書時合禮疏

注正義曰春秋之世狩獵多矣見於經者無數事焉良由得時得地則常事不

書故也以獲麟在於大野得地則不書其地知地時並得則例皆不書此書公狩於郎必是有所譏刺所刺之意在於失常地也但傳於棠與河陽已云言非其地則非地之責於理已見而此狩得時恐并時亦刺駁出合禮而非禮自明故注申其意言郎非狩地唯時合禮以時合禮地非禮也公羊傳曰常事不書此何以書譏何譏爾遠也公羊說諸侯遊戲不得過郊故有遠近之言左氏無此義要言遠者亦是譏其失常地也

○夏周宰渠伯糾來聘父在故名○秋秦師侵

芮敗焉小之也注秦以芮小輕之故為芮所敗○冬

王師秦師圍魏執芮伯以歸注三年芮伯出居魏芮

更立君秦為芮所敗故以芮伯歸將欲納之

經五年春正月甲戌巳丑陳侯鮑卒注未同盟而書名

者來赴以名故也甲戌前年十二月二十一日巳丑此  
年正月六日陳亂故再赴赴雖日異而皆以正月起文

故但書正月慎疑審事故從赴兩書音義

鮑步疏注正  
鮑反義曰

僖二十三年傳例曰赴以名則亦書之檢經傳魯未與  
陳盟而書鮑名知其來赴以名故也隱八年蔡侯考父  
卒注云蓋春秋前與惠公盟故赴以名案史記年表隱  
之元年是陳桓公之二十三年則桓公亦得與惠公盟  
而云未同盟者以蔡侯之卒去惠尚近故疑與惠公盟  
此去惠公年月已遠且自隱公以來陳魯未嘗交好於

惠公之世亦似無盟故以未同盟解之也以長厯推之知甲戌巳丑別月而赴者並言正月故兩書其日而共言正月若其各以月赴亦應兩書其月但此異年之事設令兩以月赴則當於四年云十二月甲戌陳侯鮑卒五年正月巳丑陳侯鮑卒

夏齊侯鄭伯如紀注外相朝皆言如齊欲滅紀紀人懼

而來告故書疏

注正義曰傳言朝經言如知如即朝也下文州公如曹與此相類故云外相朝

皆言如也魯出朝聘例亦言如獨言外朝者經有公朝王所以不盡云公如故獨云外也朝聘而謂之如者爾雅釋詁云如往也朝者兩君相見揖讓兩楹之間聘者使卿通問隣國執圭以致君命據行禮而為言也魯之君臣出適他國始行即書於策未知成禮以否經每有在塗乃復是禮未必成故直曰如言其往彼國耳不果

必成朝聘也公朝王所則朝訖乃書故指朝言之此齊鄭朝紀亦應朝訖乃告但畧外故言如耳外相朝例不書而此獨書者傳言欲以襄紀紀人知之明其懼而告魯故書也

天王使仍叔之子來聘注仍叔天子之大夫稱仍叔之

子本於父字幼弱之辭也譏使童子出聘疏

注正義曰天子大夫

例皆書字仍氏叔字知是天子大夫也公羊穀梁皆以仍叔之子為父老代父從政左氏直云弱也言其幼弱不言父在則是代父嗣位非父在也伯糾身未居官攝行父事故稱名以貶之此子雖已嗣位而未堪從政故繫父以譏之譏王使童子出聘也蘇氏用公羊穀梁之義以為父老出聘非父沒義或當然

葬陳桓公注無傳



城祝丘注無傳齊鄭將襲紀故

秋蔡人衛人陳人從王伐鄭注王自為伐鄭之主君臣

之辭也王師敗不書不以告音義從如字又才用反

大雩注傳例曰書不時也失龍見之時音義雩音于祭名見賢遍

反

蝻注無傳蚣蝻之屬為災故書音義蝻音終蚣相容反蝻相魚反疏

注正義曰釋蟲云蝻蝻蚣蝻楊雄方言云春黍謂之蚣蝻陸璣毛詩疏云幽州人謂之春箕春箕即春黍蝗類也長而青股鳴者或謂似蝗而小班黑其股狀如瑋瑋又五月中以兩股相切作聲聞數十步爾雅又有蜚蝻

土螽樊光云皆蚣蝑之屬然則螽之種類多故言屬以包之傳稱凡物不為災不書知此為災故書

冬州公如曹注不書奔以朝出也為下寔來書也曹國

今濟陰定陶縣音義

陶同勞反

疏

正義曰周禮公之地封疆方五百里侯四百里伯三

百里子二百里男一百里隱五年公羊傳曰天子三公稱公王者之後稱公其餘大國稱侯小國稱伯子男然則三公之外爵稱公者唯二王之後杞與宋耳此州公及僖五年晉人執虞公並是小國而得稱公者鄭玄王制注以為殷地三等百里七十里五十里武王克殷雖制五等之爵而因殷三等之地及周公制禮大國五百里小國百里所因殷之諸侯亦以功黜陟之其不滿者皆並之地為百里焉是以周世有爵尊而國小爵卑而國大者言爵尊國小蓋指此州公虞公也案虞是克商始封非為殷之餘國鄭玄之言不可通于此矣杜之所

解亦無明言唯世族譜云虞姬姓武王克商封虞仲之庶孫以為虞仲之後處中國為西吳後世謂之虞公服虔云春秋前以黜陟之法進爵為公未知孰是或可嘗為三公之官若虢公之屬故稱公也以其無文故備言之劉炫難服云周法二王之後乃得稱公雖復周公太公之勲齊桓晉文之霸位止通侯未升上等州有何功得遷公爵若其爵得稱公土亦應廣安得爵為上公地仍小國若地被兼黜爵亦宜減安得地既削小爵尚尊崇此則理之不通也注正義曰如者朝也以朝出國不得書奔外朝不書以因來向魯故書其本也世本州國姜姓曹國伯爵譜云曹姬姓文王子叔振鐸之後也武王封之陶丘今濟陰定陶縣是也桓公三十五年魯隱公之元年也伯陽立十五年魯哀公之八年而宋滅曹地理志濟陰郡定陶縣詩曹國是也

傳五年春正月甲戌巳丑陳侯鮑卒再赴也於是陳

亂文公子佗殺太子免而代之注佗桓公弟五父也

稱文公子明佗非桓公母弟也免桓公太子音義佗

河反免音問父音甫公疾病而亂作國人分散故再赴疏正義

玄論語注云病謂疾益困也○夏齊侯鄭伯朝于紀欲以襲之紀

人知之音義襲音○王奪鄭伯政鄭伯不朝注奪不

使知王政疏注正義曰隱三年傳稱王貳于虢謂欲分政于虢不復專任鄭伯也及平王崩

周人將畀虢公政即周鄭交惡未得與之八年傳曰虢公忌父始作卿士于周於是始與之政共鄭伯分

王政矣九年傳曰鄭伯為王左卿士然則虢公為右卿士與鄭伯夾輔王也此年王奪鄭伯政全奪與虢

不使鄭伯復知王政故  
鄭伯積恨不復朝王

○秋王以諸侯伐鄭鄭伯禦

之王為中軍號公林父將右軍蔡人衛人屬焉注號

公林父王卿士音義

將子匠反下及注大將同

周公黑肩將左軍

陳人屬焉注黑肩周桓公也鄭子元請為左拒以當

蔡人衛人注子元鄭公子拒方陳音義

拒俱甫反下同陳直覲反

下文之陳及注同

為右拒以當陳人曰陳亂民莫有鬪心若

先犯之必奔王卒顧之必亂蔡衛不枝固將先奔注

不能相支持也音義

卒尊忽反下同

既而萃於王卒可以集

事從之注萃聚也集成也音義

萃似類反

曼伯為右拒注

曼伯檀伯音義

曼音萬

疏

注正義曰十五年傳曰鄭伯

因櫟人殺檀伯昭十一年傳

曰鄭京櫟實殺曼伯知一人也

祭仲足為左拒原繁高渠彌以中軍

奉公為魚麗之陳先偏後伍伍承彌縫注司馬法車

戰二十五乘為偏以車居前以伍次之承偏之隙而

彌縫闕漏也五人為伍此蓋魚麗陳法音義

麗力知反注同

縫扶容反

疏

注正義曰史記稱齊景公之時有田穰

乘繩證反

且善用兵景公尊之位為大司馬六國

時齊威王用兵行威大放穰且之法乃使大夫追論

古者司馬兵法而附穰且其中凡一百五十篇號曰

司馬法車戰二十五乘為偏是彼文也五人為伍周禮司馬序官文也

戰于繻葛注繻

葛鄭地音義

繻音

命二拒曰旂動而鼓注旂旂也通

帛為之蓋今大將之麾也執以為號令音義

旂古外反又古

活反說文作檜建大木置石其上發機以砲敵麾許危反

疏

注正義曰旂之為旂事無所出說者相傳

為然成二年傳張侯曰師之耳目在吾旗鼓進退從之是在軍之士視將旗以進退也今命二拒令旂動而鼓望旗之動鼓以進兵明旂是可觀之物又旂字從扌旂旗之類故知旂為旂也周禮司常通帛為旂故云通帛為之謂通用一絳帛無畫飾也鄭玄云凡旂旗有軍衆者畫異物無者帛而已鄉遂大夫或載旂或載物衆屬軍吏無所將如鄭之意則將不得建旂而此軍得有旂者僖二十八年傳曰城濮之戰晉

中軍風于澤亡大旆之左旃是知戰必有旃故以旒為旃也鄭氏之言自謂治兵之時出軍所建不廢戰陳之上猶自用旃指麾今時為軍猶以旌麾號令故云蓋今大將之麾執以為號令也賈逵以旒為發石一曰飛石引范蠡兵法作飛石之事以證之說文亦云建大木置石其上發機以碓敵與賈同也案范蠡兵法雖有飛石之事不言名為旒也發石非旌旗之比說文載之於部而以飛石解之為不類矣且三軍之衆人多路遠發石之動何以可見而使二拒準之為擊鼓候也注以旃說為長故從之

蔡衛陳

皆奔王卒亂鄭師合以攻之王卒大敗祝聃射王中

肩王亦能軍注雖軍敗身傷猶殿而不奔故言能軍

音義

射食亦反中丁仲反殿多見反

祝聃請從之公曰君子不欲多



上人況敢陵天子乎苟自救也社稷無隕多矣注鄭

於此收兵自退音義

隕于敏反

夜鄭伯使祭足勞王且問

左右注祭足即祭仲之字蓋名仲字仲足也勞王問

左右言鄭志在苟免王討之非也音義

勞力報反注同名仲字仲

足一本作

䟽

注正義曰隱元年傳稱祭仲上云祭仲名仲字足此云祭足十一年傳云祭封人仲足

此人雖名字互見而不知孰字孰名公羊以仲為字左氏先儒亦以為字但春秋之例諸侯之卿嘉之乃

書字十一年經書祭仲而事無可嘉注意以仲為名故云名仲字仲足釋例曰伯仲叔季固人字之常然古今亦有以為名者而公羊守株專謂祭氏以仲為字既謂之字無辭以善之因托以行權人臣而善其

行權逐君是亂人倫壞大教也說左氏者知其不可更云鄭人嘉之以字告故書字此為因有告命之例欲以苟免未是春秋之實也宰渠伯糾蕭叔大心皆以伯叔為名則仲亦名也傳又曰祭仲足或偏稱仲或偏稱足蓋名仲字足也是辨其名仲之意也凡傳所記事必有意存焉此丁寧說鄭言其志在苟免知其意言王

○仍叔之子弱也注仍叔之子來聘童子討之非也

將命無速反之心久留在魯故經書夏聘傳釋之於

末秋疏

注正義曰此子來聘傳雖不言聘意蓋為將伐鄭而遣告魯也經在伐鄭之上傳在伐鄭

之下明其必有深意故注者原之以為童子將命無速反之心久留在魯故經書夏聘傳釋之於末秋譏其夏至而秋末反也下句更言秋大雩則秋未為末注云末秋者上有秋王以諸侯伐鄭此仍叔之文在

秋事之末故云末秋也下文更云秋者自為欲顯天時更別言秋

○秋大雩書不時

也注十二公傳唯此年及襄二十六年有兩秋此發

雩祭之例欲顯天時以指事故重言秋異於凡事音

義

重直用反

疏

注正義曰上既言秋王以諸侯伐鄭而此重言秋故解之方發雩祭之例須辨雩祭

之月欲顯言天時以指怠慢之事故重言秋異於凡事凡事則不須每事重舉時也襄二十六年重言秋者彼注自釋中間有初不言秋則嫌楚客過在他年凡祀啓蟄而郊注言凡祀

通下三句天地宗廟之事也啓蟄夏正建寅之月祀

天南郊音義

蟄直立反正音征

疏

注正義曰下三句謂雩嘗烝也雩是祭天嘗烝祭宗

廟此無祭地而言祭地者因天連言地耳周禮天神曰祀地祇曰祭人鬼曰享對則別為三名散則總為一號禮諸侯不得祭天魯以周公之故得郊祀上帝故雩亦祀帝書傳皆不言魯得祭地蓋不祭地也魯不祭地而注言天地者以發凡言例雖因魯史經文然凡之所論總包天子及諸國則凡公嫁女於天子諸卿皆行及王曰小童之例是也此凡祀亦總包天子及諸國則有祭地之文故杜連言之釋例云凡祀舉郊雩烝嘗則天神地祇人鬼之祭皆通其他羣祀不錄可知也祔祠及地祇經無其事故不備言亦約丈以相包也祔祠之祭過則亦書但無過時者故經不書耳夏小正曰正月啓蟄其傳曰言始發蟄也故漢氏之始以啓蟄為正月中雨水為二月節及太初以後更改氣名以雨水為正月中驚蟄為二月節以迄于今踵而不改今歷正月雨水四月中四月小滿中秋分中十月小雪中注皆以此四句為建寅建巳

建酉建亥之月則啓蟄當雨水龍見當小滿始殺當秋分閉蟄當小雪晉世之歷亦以雨水為正月中而釋例云歷法正月節立春啓蟄為中氣者因傳有啓蟄之文故遠取漢初氣名欲令傳與歷合其餘三者不可強同其名雖則不同其法理亦不異故釋例曰案歷法有啓蟄驚蟄而無龍見始殺閉蟄此古人所名不同然其法推不得有異傳曰火伏而後蟄者畢此謂十月始蟄也至十一月則遂閉之猶二月之驚蟄既啓之後遂驚而走出始蟄之後又自閉塞也是言啓蟄為正月中閉蟄為十月中也注以閉蟄為十月而釋例云十一月遂閉之者以正月半蟄蟲啓戶二月初則驚而走出十月半蟄蟲始閉十一月初則遂閉之傳稱四者皆舉中氣言其至此中氣則卜此祭次月初氣仍是祭限次月中氣乃為過時既以閉蟄為建亥之月又言十一月則遂閉之欲見閉蟄以後冬至以前皆得烝祭也故釋例云孟獻子曰啓蟄

而郊郊而後耕耕謂春分也言得啓蟄當卜郊不應過春分也春分以前皆得郊則冬至以前皆得烝也釋例又曰僖公襄公夏四月卜郊但譏其非所宜卜而不譏其四月不可郊也以建卯之月猶可郊知建子之月猶可烝也正由節卻月前未涉後月中氣故耳傳本不舉月為限而舉候以言者釋例曰凡十二月而節氣有二十四通共三百六十六日分為四時間之以閏月故節未必恒在其月初而中氣亦不得恒在其月之半是以傳舉天宿氣節為文而不以月為正也土功作者不必月日故亦言龍見而畢務戒事也火見而致用水昏正而裁日至而畢此其大準也是言凡候天時皆不以月為其節有參差故也若周禮不舉天象故以月為正大司馬職曰中夏獻禽以享礻中冬獻禽以享烝言四時之祭不得後仲月非謂孟月不得烝也釋例曰周禮祭宗廟以四仲蓋言其下限也下限至於仲月則上限起於孟月烝起

建亥之月則嘗起建申之月此言始殺而嘗謂建酉之月亦是下限也若仲是下限則周之正月得為烝祭春秋之例得常不書而八年書正月烝者釋例云經書正月烝得仲月之時也其夏五月復烝此為過時若但書夏五月烝則唯可知其非時故先發正月之烝而繼書五月烝以示非時并明再烝瀆也然仲月雖不過時而月節有前有卻若使節前月卻即為非禮此秋大雩是建午之月耳而傳言不時明涉其中氣故譏之釋例云龍星之體畢見謂立夏之月得此月則當卜祀過涉次節則以過而書故秋雩書不時此涉周之立秋節也言涉立秋節者謂涉立秋之月中氣節也過涉次節亦謂中節非初節也若始涉初節則不譏之矣如此傳注必是建寅之月方始郊天周之孟春未得郊也禮記明堂位曰魯君孟春乘大輅載弧韜以祀帝於郊季夏六月以禘禮祀周公於太廟季夏周之六月即孟春是周之正月矣又雜

記云孟獻子云正月日至可以有事於上帝七月日至可以有事於祖七月而禘獻子為之如彼記文則魯郊以周之孟春而傳言啓蟄而郊者禮記後人所錄其言或中或否未必所言皆是正禮襄七年傳孟獻子曰啓蟄而郊禮記左傳俱稱獻子而記言日至傳言啓蟄一人兩說必有謬者若七月而禘獻子為之時應有七月禘矣烝嘗過則書禘過亦應書何以獻子之時不書七月禘也是知獻子本無此言不得云禮記是而左傳非也明堂位言正月郊者蓋春秋之末魯稍僭侈見天子冬至祭天便以正月祀帝記者不察其本遂謂正月為常明堂位後世之書其末章云魯君臣未嘗相弑也禮樂刑法政俗未嘗相變也春秋之世三君見弑鬻而弔士有誅俗變多矣尚云無之此言既誣則郊亦難信以此知記言孟春非正禮也鄭玄注書多用識緯言天神有六地祇有二天有天皇大帝又有五方之帝地有崑崙之山神又



有神州之神大司樂冬至祭於圜丘者祭天皇帝  
北辰之星也月令四時迎氣於四郊所祭者祭五德  
之帝太微宮中五帝坐星也春秋緯文耀鉤云太微  
宮有五帝坐星蒼帝其名曰靈威仰赤帝曰赤熛怒  
黃帝曰含樞紐白帝曰白招拒黑帝曰汁光紀五德  
之帝謂此也其夏至郊天祭其所感之帝焉周人木  
德祭靈威仰也魯無冬至之祭唯祭靈威仰耳唯鄭  
玄立此為義而先儒悉不然故王肅作聖證論引羣  
書以證之言郊則圜丘圜丘即郊天體唯一安得有  
六天也晉武帝王肅之外孫也秦始之初定南北郊  
祭一地一天用王肅之義杜君身處晉朝共遵王說  
集解釋例都不言有二天然則杜意天子冬至所祭  
魯人啓蟄而郊猶是一天但異時祭耳此注直曰祀  
天南郊不言靈威仰明與鄭異也劉炫云夏至郊天  
后稷配也冬至祭天  
圜丘以帝嚳配也

**龍見而雩注**龍見建巳之月蒼

龍宿之體昏見東方萬物始盛待雨而大故祭天遠

為百穀祈膏雨音義

見賢遍反注同宿音秀為于偽反

疏

注正義曰天官東方

之星盡為蒼龍之宿見謂合昏見也雩之言遠也遠為百穀祈膏雨遠者豫為秋收言意深遠也穀之種類多故詩每言百穀舉成數也雨之潤物若脂膏然故謂甘雨為膏雨襄十九年傳曰百穀之仰膏雨是也傳有言雩而經書大雩者賈逵云言大別山川之雩蓋以諸侯雩山川魯得雩上帝故稱大月令云大雩帝用盛樂是雩帝稱大雩也此龍見而雩定在建巳之月而月令記於仲夏章者鄭玄云雩之正當以四月凡周之秋五月之中而旱亦脩雩祀而求雨因著正雩於此月失之矣杜君以為月令秦法非是周典潁子嚴以龍見即是五月釋例曰月令之書出自呂不韋其意欲為秦制非古典也潁氏因之以為龍

見五月五月之時龍星已過於見此為強牽天宿以附會不韋之月令非所據而據既以不安且又自違左氏傳稱秋大雩書不時此秋即潁氏之五月而忘其不時之文而欲以雩祭是言月令不得與傳合也鄭玄禮注云雩之言吁也言吁嗟哭泣以求雨也郊雩俱是祈穀何獨雩為吁嗟旱而脩雩言吁嗟可矣四月常雩於時未旱何當言吁嗟也賈服以雩為遠故杜從之也

### 始殺而嘗注建酉

之月陰氣始殺嘉穀始熟故薦嘗於宗廟疏

注正義曰嘗者

薦於宗廟以嘗新為名知必待嘉穀熟乃為之也詩稱八月其穫穫刈嘉穀乃在八月知始殺為建酉之月陰氣始殺也釋例引詩蒹葭蒼蒼白露為霜以證始殺百草也月令孟秋白露降季秋霜始降然則七月有白露八月露結九月乃成霜時寒有漸歲事稍成八月嘉穀熟所薦之物備故以建酉之月薦嘗於

宗廟案月令孟秋農乃登穀天子嘗新先薦寢廟則似七月穀熟矣七月當嘗祭而云建酉之月乃嘗祭者以上下準之始殺嘗祭實起於建申之月今云建酉者言其下限然杜獨於嘗祭舉下限者以秋物初熟孝子之祭必待新物故特舉下限而言之哀十三年子服景伯謂吳太宰曰魯將以十月上辛有事於上帝先公季辛而畢彼雖恐吳之辭亦是八月嘗祭之驗也何則於時會吳在夏公至在秋景伯言然之時秋之初也若嘗在建申當言九月不應遠指十月知十月是嘗祭之常期周之十月是建酉之月也建酉是下限耳若節前月卻孟秋物成亦可以益秋嘗祭故釋例云周禮四仲月言其下限若建申得嘗何以釋例又云始殺而嘗謂建酉之月蒹葭蒼蒼白露為霜又以始殺唯建酉之月者以賈服始殺唯據孟秋不通建酉之月故釋例破賈服而為此言也先此則不可十四年八月乙亥嘗乃是建未之月故注云

先其時亦過也

**閉蟄而烝**注建亥之月昆蟲閉戶萬物皆成

可薦者衆故烝祭宗廟釋例論之備矣音義

閉必計反又必

結反字林方結

**疏**

正義曰傳稱火伏而後蟄者畢周禮季秋內火則火以季秋入而

反烝之承反

孟冬伏昆蟲以孟冬蟄故知閉蟄是建亥之月也王制云昆蟲未蟄不以火田鄭玄云昆明也明蟲者得

陽而生得陰而藏陰陽即寒溫也祭統注云昆蟲謂溫生寒死之蟲也是蟄蟲謂之昆蟲也月令仲春云蟄蟲咸動啓戶始出言啓戶故蟄言閉戶爾雅釋詁云烝衆也知萬物皆成可薦者衆故名此祭為烝

**過則書**

注卜日有吉否過次節則書以譏慢也疏

正注

義曰祭必當卜卜有吉否不吉則當改卜次旬故不可期以一日卜不過三故限以一月過涉次月之節

則書之以譏其慢

○冬淳于公如曹度其國危遂不復注淳

于州國所都城陽淳于縣也國有危難不能自安故

出朝而遂不還音義

度待洛反復音服後不音者皆同難乃旦反

經六年春正月寔來注寔實也不言州公者承上五年

冬經如曹間無異事省文從可知音義

寔時力反省所景反

夏四月公會紀侯于成注成魯地在泰山鉅平縣東南

秋八月壬午大閱注齊為大國以戎事徵諸侯之成嘉

美鄭忽而忽欲以有功為班怒而訴齊魯人懼之故以

非時簡車馬音義

閱音悅

疏

正義曰公狩于郎公狩于禚皆書公大蒐大閱不書公者

周禮雖四時教戰而遂以田獵但蒐閱車馬未必皆因田獵田獵從禽未必皆閱車馬何則怠慢之主外作禽荒豈待教戰方始獵也公及齊人狩于禚乃與隣國共獵必非自教民戰以矢魚于棠非教戰之事主為遊戲而斥言公則狩于郎禚亦主為遊戲故特書公也大蒐大閱國家之常禮公身雖在非為遊戲如此之類例不書公定十四年大蒐于比蒲邾子來會公公身在蒐而經不書公知其法所不書以其國家大事非公私欲故也且比蒲邾間皆舉蒐地此不言地者蓋在國簡閱未必田獵昭十八年鄭人簡兵大蒐在於城內此亦當在城內注正義曰大閱之禮在於仲冬今農時閱兵必有所為傳不言其意故注者原之於時四隣與魯無怨又竟無征伐之處諸侯成齊經所不見而傳說鄭忽怒事於大閱之上及十年鄭與齊衛來戰于郎知此大閱是

懼鄭忽而畏齊人故以非時簡車馬也

蔡人殺陳佗注佗立踰年不稱爵者篡立未會諸侯也

傳例在莊二十二年疏

注正義曰殺陳佗傳無文不言無傳者以傳說此事在莊二十

二年不是全無其事故不言無傳

九月丁卯子同生注桓公子莊公也十二公唯子同是

適夫人之長子備用太子之禮故史書之於策不稱大

子者書始生也音義

適丁曆反傳同長丁丈反疏注正義曰適妻長

故以太子之禮舉之由舉以正禮故史書於策古人之立太子其禮雖則無文蓋亦待其長大特加禮命如今



之臨軒策拜始生之時未得即為太子也以其備用正禮故書其生未得命故不言太子也杜云十二公唯子同是適夫人之長子又云文公哀公其母並無明文未知其母是適以否蓋其父未為君之前已生縱令是適亦不書也釋例曰據公衡之并成公又非穆姜所生杜此注云子同是適夫人之長子備用太子之禮故史書之然則雖適夫人之長子不用太子之禮亦不書也

## 冬紀侯來朝

傳六年春自曹來朝書曰寔來不復其國也注亦承

五年冬傳淳于公如曹也言奔則來行朝禮言朝則遂留不去故變文言寔來○楚武王侵隨注隨國今

義陽隨縣疏

注正義曰世本隨國姬姓不知始封為誰隨以此年見傳僖二十年經書楚人

伐隨自是以後遂為楚之私屬不與諸侯會同至定四年吳入郢昭王奔隨隨人免之卒復楚國楚人德之使列諸侯哀元年隨侯見經其後不知為誰所滅使遠章求成焉注遠章楚

大夫音義

遠于委反

軍於瑕以待之注瑕隨地音義

瑕下加反

隨人使少師董成注少師隨大夫董正也音義

少詩照反

注及下同後皆倣此

闕伯比言於楚子曰我不得志於漢東也

我則使然注闕伯比楚大夫令尹子文之父我張吾

三軍而被吾甲兵以武臨之彼則懼而協以謀我故

難間也漢東之國隨為大隨張必棄小國注張自侈

大也音義

被皮寄反下注被甲同間間廁之間張豬亮反注同一音如字侈昌氏反又武氏反

小國離楚之利也少師侈請羸師以張之注羸弱也

音義

羸力追反注及下同

熊率且比曰季梁在何並注熊率且

比楚大夫季梁隨賢臣音義

率音律且子余反

鬬伯比曰以

為後圖少師得其君注言季梁之諫不過一見從隨

侯卒當以少師為計故云以為後圖二年蔡侯鄭伯

會于鄧始懼楚楚子自此遂盛終於抗衡中國故傳

備言其事以終始之音義

抗苦浪反

疏

正義曰言此計今雖無益以為在後

圖謀也言季梁之諫不過一見從耳少師得其君心君將必用其計若用少師則此謀必合故請示弱以希後日之利

王毀軍而納少師注從伯比之謀少師歸請

追楚師隨侯將許之注信楚弱也季梁止之曰天方

授楚楚之羸其誘我也君何急焉臣聞小之能敵大

也小道大淫所謂道忠於民而信於神也上思利民

忠也祝史正辭信也注正辭不虛稱君美今民餒而

君逞欲注逞快也音義

餒奴罪反餓也

祝史矯舉以祭臣不

知其可也注詐稱功德以欺鬼神音義

矯居正義  
兆反疏曰楚

之先君熊繹始封於楚在蠻夷之間食子男之地至此君始彊盛威服隣國似有天助故曰天方授楚臣聞小國之能敵大國也必小國得道大國淫辟如是乃得為敵也其意言隨未有道而楚未為淫辟隨不能敵楚也既言隨未有道更說為道之事道猶道路行不失正名之曰道施於人君則治民事神使之得所乃可稱為道矣故云所謂道者忠恕于民而誠信于神也此覆說忠信之義於文中心為忠言中心愛物也人言為信謂言不虛妄也在上位者思利于民欲民之安飽是其忠也祝官史官正其言辭不欺誑鬼神是其信也今隨國民皆饑餒而君快情欲是不思利民是不忠也祝史詐稱功德以欺鬼神是不正言辭是不信也無忠無信不可謂道小而無道何以敵大君欲敵之臣不知其可也欲君之下楚也公

曰吾牲牲肥腍粢盛豐備何則不信注牲牛羊豕也

牲純色完全也腍亦肥也黍稷曰粢在器曰盛音義

牲音全腍注正義曰諸侯祭用太牢祭以三牲為徒忽反疏主知牲為三牲牛羊豕也周禮牧人掌

共祭祀之牲牲祭用純色故知牲謂純色完全言毛體全具也曲禮曰豚曰腍肥肥腍具文知腍亦肥也

重言肥腍者古人自有複語耳服虔云牛羊曰肥豕曰腍案禮記豚亦稱肥非獨牛羊也粢是黍稷之別名亦為諸穀之總號祭之用米黍稷為多故曰黍稷曰粢粢是穀之體也盛謂盛於器故云在器曰盛

對曰夫民神之主也注言鬼神之情依民而行是以

聖王先成民而後致力於神故奉牲以告曰博碩肥

脂謂民力之普存也注博廣也碩大也謂其畜之碩

大蕃滋也謂其不疾癘蟲也謂其備脂咸有也注雖

告神以博碩肥脂其實皆當兼此四謂民力適完則

六畜既大而滋也皮毛無疥癬兼備而無有所闕音

義

畜吁又反下皆同蕃音煩癘七木反本又作癘同  
蠡力果反說文作癩云癘癩皮肥也疥音界癘息

淺反說文

云乾瘍奉盛以告曰絜粢豐盛謂其三時不害而

民和年豐也注三時春夏秋奉酒醴以告曰嘉栗旨

酒注嘉善也栗謹敬也謂其上下皆有嘉德而無違

心也所謂馨香無譏慝也注馨香之遠聞音義

慝他得反

聞音問又如字

故務其三時修其五教注父義母慈兄友弟

恭子孝親其九族以致其裡祀注裡絜敬也九族謂

外祖父外祖母從母子及妻父妻母姑之子姊妹之

子女子之子非已之同族皆外親有服而異族者也

音義

九族杜釋與孔安國鄭玄不同裡音因

於是乎民和而神降之福

故動則有成今民各有心而鬼神乏主注民饑餒也

音義

饑音飢

君雖獨豐其何福之有君姑修政而親兄



弟之國庶免於難隨侯懼而脩政楚不敢伐疏

正義曰鬼

神之情依人而行故云夫民神之主也以民和乃神說故聖王先成其民而後致力於神言養民使成就然後致孝享由是告神之辭各有成百姓之意祭之所用有牲有食有酒耳聖人文飾詞義為立嘉名以告神季梁舉其告辭解其告意故奉牲以告神曰博碩肥腍者非謂所祭之牲廣大肥充而已乃言民之畜產盡肥充皆所以得博碩肥腍者由四種之謂故又申說四種之事四謂者第一謂民力普徧安存故致第二畜之碩大滋息民力普存所以致之者由民無勞役養畜以時故六畜碩大蕃多滋息民力普存又致第三不有疾病疥癬所以然者由民力普存身無疲苦故所養六畜飲食以理埽刷依法故皮毛身體無疥癬疾病民力普存又致第四備腍咸有所以然者由民力普存人皆逸樂種種養畜羣牲備有也

奉盛以告神曰絜粢豐盛者非謂所祭之食絜淨豐多而已乃言民之糧食盡豐多也言豐絜者謂其春夏秋三時農之要節為政不害於民得使盡力耕耘自事生產故百姓和而年歲豐也奉酒醴以告神曰嘉粟旨酒者非謂所祭之酒粟善味美而已乃言百姓之情上下皆善美也言嘉旨者謂其國內上下羣臣及民皆有善德而無違上之心若民心不和則酒食腥穢由上下皆善故酒食馨香非言酒食馨香無腥膻臭穢乃謂民德馨香無譏諛邪惡也所謂馨香總上三者由是王者將說神心先和民志故務其三時使農無廢業脩其五教使家道協和親其九族使內外無怨然後致其絜敬之祀於神明矣於是民族大和而神降之福故動則有成戰無不克今民各有心或欲從主或欲叛君不得為無違上之心而鬼神乏主百姓饑餒民力彫竭不得為年歲豐也民既不和則神心不說君雖獨豐其何福之有神所不福民

所不與以此敵大必喪其師君且脩政撫其民人而  
親兄弟之國以為外援如是則庶幾可以免於禍難  
也告牲肥碩言民畜多告粢豐絜言民食多告酒嘉  
旨不言民酒多而言民德善者酒之與食俱以米粟  
為之於盛已言年豐故於酒變言嘉德重明民和之  
意注正義曰劉炫云杜以博碩肥脂據牲體而言季  
梁推出此理嫌其不寔故云其實皆當兼此四謂又  
民力普存非畜之形貌而季梁以之解情又申之民  
力適完則得生養六畜故六畜既大而滋息也博碩  
言其形狀大蕃滋言其生乳多碩大蕃滋皆複語也  
癘蠱畜之小病故以為癘疥之疾也不疾者猶言不  
患此病也○嘉善釋詁文也杜訓粟為謹敬言善敬  
為酒案詩實穎實粟與田事相連故粟為穗貌此粟  
與嘉善旨酒相類故粟為謹敬之心即論語云使民  
戰栗與此相似劉炫以粟為穗貌而規杜過於理恐  
非○父母於子並為慈但父主教訓母主撫養撫養

在於恩愛故以慈為名教訓愛而加教故以義為稱  
義者宜也教之義方使得其宜弟之於兄亦宜為友  
但兄弟相敬乃有長幼尊卑故分出其弟使之為共  
言敬其兄而友愛○釋詁云裡敬也故以裡為絜敬  
隱十一年注云絜齊以享謂之裡意亦與此同也漢  
世儒者說九族有二異義今禮戴尚書歐陽說九族  
乃異姓有屬者父族四五屬之內為一族父子女昆弟  
適人者與其子為一族已女昆弟適人者與其子為  
一族已之女子適人者與其子為一族母族三母  
之父姓為一族母之母姓為一族母女昆弟適人者  
與其子為一族妻族二妻之父姓為一族妻之母姓  
為一族古尚書說九族者從高祖至玄孫凡九皆同  
姓謹案禮總麻三月以上恩之所及禮為妻父母有  
服明在九族中九族不得但施於同姓鄭駁云玄之  
聞也婦人歸宗女子雖適人字猶絜姓明不得與父  
兄為異族其子則然婚禮請期辭曰唯是三族之不

虞欲及今三族未有不億度之事而迎婦也如此所  
云三族不當有異姓異姓其服皆總禮雜記下總麻  
之服不禁嫁女取婦是為異姓不在族中明矣周禮  
小宗伯掌三族之別名喪服小記說服之義曰親親  
以三為五以五為九以此言之知高祖至玄孫昭然  
察矣是鄭從古尚書說以九族為高祖至玄孫也此  
注所云猶是禮戴尚書歐陽等說以鄭玄駁云女子  
不得與父兄為異族故簡去其母唯取其子以服重  
者為先耳其意亦不異也不從古學與鄭說者此言  
親其九族詩刺不親九族必以九族者疏遠恩情已  
薄故刺其不親而美其能親耳高祖至父已之所稟  
承也子至玄孫已之所生育也人之於此誰或不親  
而美其能親也詩刺棄其九族豈復上遺父母下棄  
子孫哉若言棄其九族謂棄其出高祖出曾祖者然  
則豈亦棄其出曾孫出玄孫者乎又鄭玄為昏必三  
十而娶則人年九十始有曾孫其高祖玄孫無相及

之理則是族終無九安得九族而親之三族九族族名雖同而三九數異引三族以難九族為不相值矣若緣三及九則三九不異設使高祖喪玄孫死亦應不得為昏禮何不言九族之不虞也以此知九族皆外親有服而異族者也

○夏會于成紀來諮謀齊難也注齊欲

滅紀故來謀之音義

難乃旦反下同

○北戎伐齊齊使乞師

于鄭鄭太子忽帥師救齊六月大敗戎師獲其二帥

大良少良甲首三百以獻於齊注甲首被甲者首音

義

帥所類反少詩照反

於是諸侯之大夫成齊齊人饋之餼注

生曰餼音義

饋其媿反遺也餼許既反牲腥曰餼

使魯為其班後鄭注

班次也魯親班齊饋則亦使大夫戍齊矣經不書蓋

史闕文疏

注正義曰劉炫云在戍受饋而使魯為班明魯人在矣襄五年戍陳書經此戍齊亦

宜書今不書經疑史闕文以史策本闕仲尼不得書之十年說此云北戎病齊諸侯救之或可魯亦往救但傳無魯事之驗魯必不救不須解之鄭忽以其有功也怒故有郎之

師注郎師在十年公之未昏于齊也齊侯欲以文姜

妻鄭太子忽太子忽辭人問其故太子曰人各有耦

齊大非吾耦也詩云自求多福注詩大雅文王言求

福由已非由人也音義

妻七計反下及注同

在我而已大國何

為君子曰善自為謀注言獨絜其身謀不及國及其

敗戎師也齊侯又請妻之注欲以他女妻之固辭人

問其故大子曰無事於齊吾猶不敢今以君命奔齊

之急而受室以歸是以師昏也民其謂我何注言必

見怪於民遂辭諸鄭伯注假父之命以為辭為十一

年鄭忽出奔衛傳○秋大閱簡車馬也○九月丁卯

子同生以大子生之禮舉之接以大牢注大牢牛羊

豕也以禮接夫人重適也音義

接如字鄭注禮記作捷讀此者亦或捷音



疏

注正義曰大牢牢之大者三牲牛羊豕具為大牢儀禮少牢饋食之禮以羊豕為少牢以牲多少稱

大小也詩公劉曰執豕於牢周禮充人掌繫祭祀之牲牲祀五帝則繫于牢芻之三月是牢者養牲之處故因以為名鄭玄詩箋云繫養曰牢是其義也禮記內則曰國君世子生告於君接以大牢文在三日負子之上則三日之內接之矣記云凡接子擇日鄭云雖三日之內必選其吉焉是三日之內擇日接之為子接母故記稱接子此傳舉之之下即云接以大牢亦以接子為文其實接母故云以禮接夫人重適也鄭玄云接讀為捷捷勝也謂食其母使補虛強氣也此言以禮接之則與鄭異也內則又云接子庶人特豚士特豕大夫少牢國君世子則皆降等

卜士負之士妻食之注

禮世子生三日卜士負之射人以桑弧蓬矢射天地

四方卜士之妻為乳母音義

食音嗣弧音胡蓬步疏弓反射天地食亦反

注正義曰四方以上皆內則文也內則又云卜士之妻大夫之妾使食子食謂乳也故以乳母言之鄭玄云桑弧蓬矢本大古也天地四方男子所有事也士妻大夫之妾謂時自有子者定本直云射四方無天地案禮云桑弧蓬矢六今無天地誤也賈逵云桑者木中之衆蓬者草中之亂取其長大統衆而治亂

公與文姜宗婦命之注世子生三月君夫人沐浴於

外寢立於阼階西向世婦抱子升自西階君命之乃

降蓋同宗之婦音義

阼才反疏注正義曰乃降以上皆故反內則文也鄭玄云子升

自西階則人君見世子於路寢也見妾子就側室凡子生皆就側室以其生於側室見於路寢故從外而

升階也襄二年葬齊姜傳曰齊侯使諸姜宗婦來送葬諸姜是同姓之女知宗婦是同宗之婦也公與夫人共命之故使宗婦侍夫人

公問名於申繻對曰名有五有信有

義有象有假有類注申繻魯大夫音義

繻音須

以名生

為信注若唐叔虞魯公子友以德命為義注若文王

名昌武王名發疏

注正義曰周本紀稱大王見季歷生昌有聖瑞乃言曰我世當有興

者其在昌乎則是大王見其有瑞度其當興故名之曰昌欲令昌盛周也其度德命發則無以言之服虔云謂若大王度德命文王曰昌文王命武王曰發似其有舊說也舊說以為文王見武王之生以為必發兵誅暴故名曰發

以類命為象注若孔子首象尼正疏

注正義曰

孔子世家云叔梁紇與顏氏禱於尼正得孔子孔子生而首上圩頂故因名曰正字仲尼是其象尼正也

取於物為假注若伯魚生人有饋之魚因名之曰鯉

音義

鯉音里

疏

注正義曰家語本姓篇云孔子年十九娶於宋升官氏一歲而生伯魚伯魚生

魯昭公以鯉魚賜孔子孔子榮君之賜因名子曰鯉字伯魚此注不言昭公賜而云人有饋之者如家語則伯魚之生當昭公九年昭公庸君孔子尚少未必能尊重聖人禮其生子取其意而遺其人疑其非昭公故取於父為類注若子同生有與父同者不以國注

國君之子不自以本國為名也疏

注正義曰下云以國則廢名以國不

可易湏廢名不諱若以他國為名則不湏自廢名也且春秋之世晉侯周衛侯鄭陳侯吳衛侯晉之徒皆

以他國為名以此知不以國者謂國君之子不得自  
以本國為名不以山川者亦謂國內之山川下云以  
山川則廢主廢主為廢國內之所主祭也若他國山  
川則非其主不須廢也此雖因公之問而對以此法  
曲禮亦云名子者不以國不以日月不以隱疾不以  
山川則諸言不以者臣民亦不得以此注以其言  
國故特云國君子耳其實雖非國君之子亦不得以  
國為名其言廢名廢禮之徒唯謂國君之子若使臣  
民之名國家不為之廢也然則臣民之名亦不以山  
川而孔子魯人尼丘魯山得以丘為名者蓋以其有  
象故特以類**不以官不以山川不以隱疾**注隱痛疾  
命非常例也

患辟不祥也**疏**

注正義曰鄭玄云隱疾衣中之疾也謂若黑臀黑肱矣疾在外者雖不得

言尚可指摘此則無時可辟俗語云隱疾難為醫案  
周語單襄公曰吾聞成公之生也其母夢神規其臀

以黑曰使有晉國故命之曰黑臀此與叔虞季友復何以異而云不得名也且黑臀黑肱本非疾病以證隱疾非其類也詩稱如有隱憂且隱為痛也

不以畜

牲注畜牲六畜疏

注正義曰爾雅釋畜於馬牛羊豕狗雞之下題曰六畜故鄭衆服虔

皆以六畜為馬牛羊豕犬雞周禮牧人掌牧六牲鄭玄亦以馬牛等六者為之然則畜牲一物養之則為畜共用則為牲故不以器幣注幣玉帛疏

注正義曰周禮小行

人合六幣圭以馬璋以皮璧以帛琮以錦琥以繡璜以黼然則幣玉帛者謂此圭璋璧琮帛錦繡黼之屬也以幣以幣為玉帛則器者非徒玉器服虔以為俎豆壘彝犧象之屬皆不可以為名也

周人以

諱事神名終將諱之注君父之命固非臣子所斥然

禮既卒哭以木鐸狗曰舍故而諱新謂舍親盡之祖

而諱新死者故言以諱事神名終將諱之自父至高

祖皆不敢斥言

**音義**

周人以諱事神名絕句衆家多以名字屬下句鐸待洛反狗似

俊反本又作殉疏正義曰自殷以往未有諱法諱始

同舍音捨下同疏於周周人尊神之故為之諱名以

此諱法敬事明神故云周人以諱事神子生三月為

之立名終久必將諱之故須豫有所辟為下諸廢張

本也終將諱之謂死後乃諱之注正義曰君父之名

固非臣子所斥謂君父生存之時臣子不得指斥其

名也禮稱父前子名君前臣名鄭玄云對至尊無大

小皆相名是對父則弟可以名兄對君則子可以名

父非此則不可也文十四年傳曰齊公子元不順懿

公之為政也終不曰公曰夫已氏注云猶言某甲是

斥君名也彼以不順故斥其名知平常不斥君也成  
十六年傳曰樂書將載晉侯鉞曰書退國有大任焉  
得專之注云在君前故子名其父彼以對君故名其  
父知平常不斥父也雖不斥其名猶未是為諱曲禮  
曰卒哭乃諱鄭玄云敬鬼神之名也諱辟也生者不  
相辟名衛侯名惡大夫有石惡君臣同名春秋不非  
是其未為之諱故得與君同名但言及於君則不斥  
君名耳既言生已不斥死復為之加諱欲表為諱之  
節故言然以形之禮既卒哭以木鐸狗曰舍故而諱  
新自寢門至於庫門皆禮記檀弓文也既引其文更  
解其意謂舍親盡之祖而諱新死者也親盡謂高祖  
之父服絕廟毀而親情盡也卒哭之後則以鬼神事  
之故言以諱事神又解終將諱之所諱世數自父上  
至高祖皆不敢斥言此謂天子諸侯禮也曲禮曰逮  
事父母則諱王父母不逮事父母則不諱王父母鄭  
玄云此謂庶人適士以上廟事祖雖不逮事父母猶



諱祖以其立廟事之無容不為之諱也天子諸侯立親廟四故高祖以下皆為諱親盡乃舍之既言以諱事神則是神名必諱文王名昌武王名發詩雖禘大祖祭文王之廟也其經曰克昌厥後周公制禮醴人有昌本之菹七月之詩周公所作經曰一之日觴發烝民詩曰四方爰發皆不以為諱而得言之者古人諱者臨時言語有所辟耳至於制作經典則直言不諱曲禮曰詩書不諱臨文不諱是為詩為書不辟諱也由作詩不諱故祭得歌之尚書牧誓云今予發武成云周王發武王稱名告衆史官錄而不諱知於法不當諱也金縢云元孫某獨諱者成王啓金縢之書親自讀之諱其父名口改為某既讀之後史官始錄依王所讀遂即云某武成牧誓則宣諸衆人宣訖即錄故因而不改也古者諱名不諱字禮以王父字為氏明其不得諱也屈原云朕故以國則廢名注國不皇考曰伯庸是不諱之驗也

可易故廢名疏

注正義曰國名受之天子不可輒易若以國為名終卒之後則廢名不諱

若未卒之前誤以本國為名則改其所名晉之先君唐叔封唐變父稱晉若國不可易而晉得改者蓋王命使改之以官則廢職以山川則廢主注改其山川之名

疏

注正義曰廢主謂廢其所主山川之名不廢其所主之祭知者漢文帝諱恒改北嶽為常山諱名不

廢嶽是也劉炫云廢主謂廢其所主山川不復更以得共祀故須改其山川之名魯改二山是其事也以

畜牲則廢祀注名猪則廢猪名羊則廢羊以器幣則

廢禮晉以僖侯廢司徒注僖侯名司徒廢為中軍疏

正義曰祀以牲為主無牲則祀廢器幣以行禮器少則禮闕祀雖用器少一器而祀不廢且諸禮皆用器

幣故以廢  
禮總之

宋以武公廢司空注武公名司空廢為司

城先君獻武廢二山注二山具教也魯獻公名具武

公名教更以其鄉名山音義

教五  
羔反

疏

注正義曰晉語  
云范獻子聘於

魯問具教之山魯人以其鄉對獻子曰不為具教乎  
對曰先君獻武之諱也是以其鄉對山也禮稱舍故  
而諱新親盡不復更諱計獻子聘魯在昭公之世獻  
武之諱久已舍矣而尚以其鄉對者當諱之時改其  
山號諱雖已舍山不復名故依本改名以其鄉對猶  
司徒司空雖歷世多而不復故名也然獻子言之不  
為失禮而云名其二諱以自尤者禮入國而問是以  
禁入門而問諱獻子入魯不問故以之為慙耳是以  
大物不可以命公曰是其生也與吾同物命之曰同

注物類也謂同日疏

注正義曰魯世家云桓公六年夫人生子與桓公同日故名之

曰同是知同物為同日也言物類者辨此以為類命也

○冬紀侯來朝請王命

以求成于齊公告不能注紀微弱不能自通於天子欲因公以請王命公無寵於王故告不能

春秋左傳注疏卷五

春秋左氏傳注疏卷五考證

齊侯衛侯胥命于蒲○

臣召南

按傳曰不盟也公羊曰

近正穀梁曰近古皆以胥命為許之之詞荀子曰春秋善胥命荀子嘗從虞卿受左氏春秋可見古人學春秋者皆以胥命為善宋儒疑胥命為自相推為侯伯恐未當也

秋七月壬辰朔注日月同會月奄日○東萊集解引此奄作掩

傳芮伯疏芮則不知誰滅之○

臣召南

按史記秦本紀

德公元年梁伯芮伯來朝成公元年又來朝至繆公二十年秦滅梁芮是秦并其地也

春正月公狩于郎注周之春夏之冬也田狩從夏時○

臣浩

按傳云書時禮也並可為春秋所書春正月皆

從周正之証不然春蒐禮也何以當春書狩而尚曰禮乎

春正月甲戌己丑陳侯鮑卒○

臣浩

按先儒趙匡疑甲

戌下當有記陳佗作亂事今簡脫之葉夢得曰甲戌下無文經成而亡之也比較注再赴之說為長

城祝丘

○臣召南

按杜不注祝丘所在漢地理志東海

郡即丘注孟康曰古祝丘

傳命二拒曰旂動而鼓疏周禮司常通帛為旌○旌監本訛作旂今改正

又疏說文載之於部○臣浩

按於部當作於部凡旗

之屬皆從於今各本皆誤未敢輒改

傳鄭伯使祭足勞王注王討之非也○

臣召南

按鄭寤

生不臣至於抗拒六師射王中肩罪惡重大所惜周室微弱不能討耳杜注可謂昧於大義矣

傳閉蟄而烝○趙汭補注曰三代正朔不同故一以節氣為限

傳楚武王侵隨○陳傅良曰楚事始見於傳至莊十年敗蔡始見經

臣召南

按史記年表桓公六年楚武王

之三十五年也楚世家三十五年伐隨隨人為之周



請尊楚王室不聽還報楚則此時尚未稱王傳稱武王者追叙之文也

傳君雖獨豐疏此注所云猶是禮戴尚書歐陽等說○

刊本脫尚書二字今補

臣浩

按文勢當作戴禮歐陽

尚書等說或曰先言經而姓次之尊經也

傳使魯為其班後鄭注經不書蓋史闕文○趙汭補注引陳氏曰凡諸侯交成雖內不書

春秋左傳注疏卷五考證

謹按第八頁後六行疏故知此卽非國內之狩地  
刊本監本毛本卽訛卽據宋本改

第十二頁後二行注為下寔來書也刊本寔訛實  
今改

第十五頁前行疏禴字從𠂔諸本𠂔訛於又通  
帛為禴諸本禴訛禴據宋本及周禮改

第三十六頁後五行疏不復更得共祀諸本共祀  
其據宋本改

欽定四庫全書



欽定四庫全書

覆校官編修臣張秉愚

校對官修撰臣張書勲

謄錄監生臣陸學稼

欽定四庫全書薈要

經部  
左傳注疏卷六

詳校官原任侍講臣王燕緒



欽定四庫全書薈要卷一千一百二十二

經部

春秋左傳注疏卷六

起桓公七年  
盡十八年

晉杜氏注 唐陸德明音義 孔穎達疏

經七年春二月己亥焚咸丘注無傳焚火田也咸丘魯

地高

平鉅野縣南有咸亭譏盡物故書音義

焚扶疏注  
云反

義曰咸丘地名以火焚地明為田獵故知焚是火田也  
不言蒐狩者以火田非蒐狩之法而直書其焚以譏其  
盡物也釋例曰咸丘魯地非蒐狩常處經不言蒐狩但  
稱焚咸丘言火田盡物非蒐狩之義是言火田非狩法  
故不書狩狩既非法雖得地亦譏不復譏其失地地咸  
丘知地亦非也禮記王制云昆蟲未蟄不以火田則是

已蟄得火田也又爾雅釋天云火田為狩似法得火田而譏其焚者說爾雅者李巡孫炎皆云放火烧草守其下風周禮羅氏蜡則作羅襦鄭云襦細密之羅此時蟄者畢矣可以羅罔圍取禽也今俗放火張羅其遺教然則彼火田者直焚其一叢一聚羅守下風非謂焚其一澤也禮天子不合圍諸侯不掩羣尚不盡取一羣豈容并焚一澤知其譏盡物故書也沈氏以周禮仲春火弊謂夏之仲春今周之二月乃夏之季冬故譏其盡物義也亦通

夏穀伯綏來朝

音義綏須唯反

鄧侯吾離來朝注不總稱朝者各自行朝禮也穀國在

南鄉筑陽縣北音義

筑音竹



傳七年春穀伯鄧侯來朝名賤之也注辟陋小國賤

之禮不足故書名以春來夏乃行朝禮故經書夏音

義

辟匹亦反本又作僻同

疏

注正義曰傳直云賤之不言賤意以穀鄧是南方諸侯近楚小國明

以辟陋小國故賤之也賤之者以其朝禮不足故書名也曲禮云諸侯不生名今生書其名欲比之附庸

但實非附庸故仍書其爵介葛盧言來不言朝全不能行朝禮此則行朝禮但禮不足耳傳在春經在夏

經書實朝之日故春秋來至夏乃書之世本鄧為曼姓莊十六年楚文王滅之穀則不知何姓是誰滅之服

注云穀鄧密通于楚不親仁善鄰以自固卒為楚所滅無同好之救桓又有弑賢兄之惡故賤而名之衛

冀隆難杜云傳曰要結外援好事鄰國以衛社稷又云服於有禮社稷之衛穀鄧在南地屬衛岳以越棄

彊楚遠朝惡人卒至滅亡故書名以賤之杜駁論先儒自謂一準丘明之傳今僻陋之語傳本無文杜何所準馮知其僻陋傳又稱莒之辭陋而經無貶文穀鄧辟陋何以書名此杜義不通秦道靜釋云杞桓公來朝用夷禮故曰子杞文公來盟傳云賤之明賤其行夷禮也然則穀鄧二君地接荆蠻來朝書名明是賤其僻陋也此則傳有理例故杜據而言之若必魯桓惡人不合朝聘何以伯糾來聘譏其父在仍叔之子譏其幼弱又魯班齊饋春秋所善美魯桓之有禮責三國之來伐而言遠朝惡人非其辭也○夏

盟向求成于鄭既而背之注盟向二邑名隱十一年

王以與鄭故求與鄭成音義

盟音孟向傷亮反背音佩疏注正義曰此盟

向之邑必有主據之言求成于鄭是主求成也隱十一年王以與鄭傳稱王不能有然則鄭雖得之亦不

能有故今始求成既而背之是背鄭歸王故○秋鄭  
王遷于邾若主不歸王則王無由得遷之也

人齊人衛人伐盟向王遷盟向之民于邾注邾王城

音義邾古洽反○冬曲沃伯誘晉小子侯殺之注曲沃伯

武公也小子侯哀侯子

經八年春正月己卯烝注無傳此夏之仲月非為過而

書者為下五月復烝見瀆也例在五年音義烝之承反夏戶雅反

為下于偽反復扶疏正義曰衛氏難杜云上五年閉蟄  
又反見賢遍反而烝謂十月此正月烝則是過時

而烝春秋有一貶而起二事者若武氏子來求賻一賁  
天王求賻二賁魯之不共此正月烝一賁過時二賁見

讀何為不可而云非為過時者秦氏釋云案周禮四時之祭皆用四仲之月此正月則夏之仲冬何為不得烝而云過時也又傳無過時之文明知直為再烝而讀也

天王使家父來聘注無傳家父天子大夫家氏父字

夏五月丁丑烝注無傳

秋伐邾注無傳

冬十月雨雪注無傳今八月也書時失音義

雨于付反

祭公來遂逆王后于紀注祭公諸侯為天子三公者王

使魯主昏故祭公來受命而逆也天子無外故因稱王

后卿不書舉重略輕音義

祭側疏

注正義曰隱元年云祭伯今而稱公知其

為天子三公公羊亦云祭公者何天子之三公也從周  
向紀不由魯國縱令因使過魯自當假道而去不須言  
來也凡言遂者因上事生下事之辭既書其來又言遂  
逆是先來見魯君然後向紀知王使魯主昏故祭公來  
受魯命而往迎也凡昏姻皆賓主敵體相對行禮天子  
嫁女於諸侯使諸侯為主令與夫家為禮天子聘后於  
諸侯亦使諸侯為主令與后家為禮嫁女則送女於魯  
令魯嫁女與人迎后則令魯為主使魯遣使往逆故祭  
公受魯命也嫁王女者王姬至魯而後至夫家其王后  
昏后不來至魯者以王姬至魯待夫家之逆以為禮故  
酒至魯后則王命已成於魯無事故即歸京師於逆稱  
王后舉其得王之命后禮已成於歸稱季姜申父母之  
尊言子尊不加於父母從父母之家而將歸於王據父  
母之家為文故於歸申父母之尊也公不獨行必有卿

從卿不書舉重略輕也知非卿不行者以傳云禮也釋  
例曰襄十五年劉夏逆王后於齊傳曰卿不行非禮也  
知祭公如紀時亦有卿卿不書舉重略輕猶韋卿之戰  
唯書卻克林父此天子使公卿之文是杜約彼文知公  
行必卿從也異義公羊說天子至庶人皆親迎左氏說  
王者至尊無敵體之義不親迎鄭玄駁之曰文王親迎  
於渭濱即天子親迎也天子雖尊其於后則夫婦也夫  
婦判合禮同一體所謂無敵豈施於此哉禮記哀公問  
曰冕而親迎不已重乎孔子對曰合二姓之好以繼先  
聖之後以為天地之主非天子則誰乎是鄭以天子當  
親迎也此注之意猶以為天子不親迎者以此時祭公  
迎后傳言禮也劉夏逆后譏卿不行皆不譏王不親行  
朋是主不當親也文王之迎太姒身為公子迎在殷世  
未可據此以為天子禮也孔子之對哀公自論魯國之  
法魯周公之後得郊祀上帝故以先聖天地為言耳其  
意非說天子禮也且鄭玄注禮自以先聖為周公及駁

異義則以為天子二  
三其德自無定矣

傳八年春滅翼注曲沃滅之○隨少師有寵楚鬬伯

比曰可矣讎有釁不可失也注釁瑕隙也無德者寵

國之釁也音義

釁許觀反注同

夏楚子合諸侯于沈鹿注沈

鹿楚地黃隨不會注黃國今弋陽縣音義

弋餘職反

使遂

章讓黃注責其不會楚子伐隨軍於漢淮之間季梁

請下之弗許而後戰注下之請服也音義

下避嫁反注同

疏

正義曰漢淮二水名漢淮之間漢北淮南禹貢云嶠  
冢導漾東流為漢又東為滄浪之水過三塗至于大

別南入于江孔安國云泉始出山為漾水東南流為  
沔水至漢中東行為漢水釋例曰漢一名沔水出武  
都沮縣東經漢中魏興至南陽東南經襄陽至江夏  
安陸縣入江禹貢又云導淮自桐柏東會于泗沂東  
入于海釋例曰淮出義陽平氏縣桐柏山東北  
經汝陰淮南譙國沛國下邳至廣陵縣入海也所以

怒我而怠寇也少師謂隨侯曰必速戰不然將失楚

師隨侯禦之望楚師注遙見楚師音義

將失楚師一本無師字

季梁曰楚人上左君必左注君楚君也無與王遇且  
攻其右右無良焉必敗偏敗衆乃攜矣少師曰不當  
王非敵也弗從注不從季良謀戰于速杞隨師敗績



隨侯逸注速祀隨地逸逃也鬬丹獲其戎車與其戎

右少師注鬬丹定大夫戎車君所乘兵車也戎右車

右也寵之故以為右秋隨及楚平楚子將不許鬬伯

比曰天去其疾矣注去疾謂少師見獲而死音義起

呂反隨未可克也乃盟而還○冬王命虢仲立晉哀

侯之弟緡于晉注虢仲王卿士虢公林父音義緡亡

○祭公來遂逆王后于紀禮也注天子娶於諸侯使

同姓諸侯為之主祭公來受命于魯故曰禮

經九年春紀季姜歸于京師注季姜桓王后也季字姜

紀姓也書字者伸父母之尊音義

伸音

疏

注正義曰時當桓王故云

桓王后也公羊傳曰其稱紀季姜何自我言紀父母之於子雖為天王后猶曰吾季姜是申父母之尊也公羊又曰京師者何天子之居也京者何大也師者何衆也天子之居必以衆大之辭言之

夏四月

秋七月

冬曹伯使其世子射姑來朝注曹伯有疾故使其子來

朝音義

射姑音亦又音夜

疏

注正義曰朝禮當君自親行不應使太子也當享而太子歎明年而

曹伯卒知其有疾故使太子來朝也太子不合稱朝攝行父事故言朝也諸經稱世子及衛世叔申經作世字傳皆為大然則古者世之與大字義通也

傳九年春紀季姜歸于京師凡諸侯之女行唯王后

書注為書婦人行例也適諸侯雖告魯猶不書音義

為于偽反○巴子使韓服告于楚請與鄧為好注韓服巴

行人巴國在巴郡江州縣音義好呼報反疏注正義曰以

巴行人行人謂使人也地理志巴郡故巴國江州是其治下縣也昭十三年楚共王與巴姬埋璧則巴國姬姓也此年傳文十六年與秦楚滅庸以後不見蓋楚滅之

楚子使道朔將巴客

以聘於鄧注道朔楚大夫巴客韓服鄧南鄙鄆人攻

而奪之幣注鄆在今鄧縣南沔水之上音義

鄆音憂沔面善

反

殺道朔及巴行人楚子使薳章讓于鄧鄧人弗受

注言非鄆人所攻夏楚使鬬廉帥師及巴師圍鄆注

鬬廉楚大夫鄧養甥聃甥帥師救鄆三逐巴師不克

注二甥皆鄧大夫音義

聃乃甘反

疏

正義曰三逐巴師謂鄧師逐巴師也不克

謂楚巴不能克鄧故鬬廉設權以誘之

鬬廉衡陳其師於巴師之中以

戰而北注衡橫也分巴師為二部鬬廉橫陳於其間

以與鄧師戰而偽北北走也音義

衡如字一音橫陳直覲反注同又如

字北如字一音佩嵇康音胸背

鄧人逐之背巴師而夾攻之注楚師

偽走鄧師逐之背巴師巴師攻之楚師自前還與戰

音義

背音佩注同夾古洽反又古協反

鄧師大敗鄴人宵潰注宵夜

也音義

潰戶對反

○秋號仲芮伯梁伯荀侯賈伯伐曲沃

注梁國在馮翊夏陽縣荀賈皆國名音義

夏戶雅反疏注正

義曰地理志云馮翊夏陽縣故少梁也是梁在夏陽也僖十七年傳曰惠公之在梁也梁伯妻之梁嬴孕過期既以國配嬴則梁為嬴姓世本荀賈皆姬姓僖十九年秦人滅梁荀賈不知誰滅之晉大夫有荀氏

賈氏蓋晉減之以賜大夫

○冬曹大夫來朝賓之以上卿禮也注

諸侯之適子未誓於天子而攝其君則以皮帛繼子

男故賓之以上卿各當其國之上卿音義

適丁歷反疏注

義曰繼子男以上皆周禮典命職文也鄭玄云誓猶命也言誓者明天子既命以為之嗣樹子不易也釋例曰周禮諸侯之適子誓於天子則下其君禮一等未誓則以皮帛繼子男此謂公侯伯子男之世子出會朝聘之儀也誓者告於天子正以為世子受天子報命者也未誓謂在國正之而未告天子者也曹之世子未誓而來故賓之以上卿謂比於諸侯之上卿繼子男之末命數相準故也是言曹大夫子由未誓之故賓之以上卿謂以賓客待之同上卿之禮也卿禮殮褻積膳之數掌客聘禮略有其事傳不言未誓知

曹大子必未誓者若誓則下其君一等而已侯伯之子當如子男不得徒以上卿之禮待之也釋例總論世子故言比於諸侯之上卿此指說曹國故分朋辦之云各如其國之上卿僖二十九年傳曰在禮卿不會公侯會伯子男可也昭二十三年傳曰列國之卿當小國之君固周制也然則小國之君乃當大國之卿小國之世子必不得當大國之卿故知各如其國之上卿耳何休膏肓以為左氏以人子安處父位尤非衰世救失之宜於義左氏為短鄭箴云必如所言父有老耄罷病孰當理其政預王事也蘓云誓於天子下君一等未誓繼子男並是降下其君寧是安居父位

享曹大子初獻樂奏而

歎注酒始獻音義

享許兩反

施父曰曹大子其有憂乎非

歎所也注施父魯大夫音義

施色鼓反人疏正義曰名字父音甫疏眼虔云

古之為事食所以觀威儀省福禍無喪而戚憂必  
警焉今天子臨樂而歎是父將死而兆先見也

經十年春王正月庚申曹伯終生卒注未同盟而赴以

名

夏五月葬曹桓公注無傳

秋公會衛侯于桃丘弗遇注無傳衛侯與公為會期中

背公更與齊鄭故公獨往而不相遇也桃丘衛地濟北

東阿縣東南有桃城音義

仲如字一音丁  
反背音佩

冬十有二月丙午齊侯衛侯鄭伯來戰于郎注改侵伐



而書來戰善魯之用周班惡三國討有辭音義

惡鳥洛反又音

鳥路

疏注正義曰周禮大司馬以九伐之法正邦國賊反賢害民則伐之負固不服則侵之然則侵伐者

師旅討罪之名也魯以周禮為班則魯有禮矣三國伐有禮是討有辭矣春秋善魯之用周班不使三國得伐之故改侵伐而書來戰言若三國自來戰而魯人不與戰也釋例曰齊侯衛侯鄭伯來戰于郎夫子善魯人之秉周禮惡三國之伐有禮故正王爵以表周制去侵伐以見無罪此聖人之所以扶獎王室敦崇大教故改常例以特見之

是其義也

傳十年春曹桓公卒注終施父之言○虢仲諧其大

夫詹父於王注虢仲王卿士詹父屬大夫音義

諧側鵠反

詹章疏

注正義曰周禮每卿之下皆有大夫傳言譖其大夫知是屬己之大夫非號大夫者若號

國大夫號仲自得加罪無為譖之於王且其若是號人不得以王師伐號故也

詹父有辭以

王師伐號○夏號公出奔虞注虞國在河東大陽縣

疏

注正義曰譜云虞姬姓也周大王之子大伯之弟仲雍是為虞仲嗣大伯之後武王克商封虞仲之

庶孫以為虞仲之後處中國為西吳後世謂之虞公僖五年晉滅之地理志河東大陽縣周武王封大伯後於此是為虞公志言大伯後者以仲雍嗣大伯故也

○秋秦人納芮伯萬于

芮注四年圍魏所執者○初虞叔有玉注虞叔虞公

之弟疏

注正義曰祭叔既為祭公之弟知虞叔亦是虞公之弟

虞公求旃注旃

之也音義

旃之然反

弗獻既而悔之曰周諺有之匹夫無

罪懷璧其罪注人利其璧以璧為罪音義

諺音彦

疏

正義

曰士大夫以上則有妾媵庶人惟夫妻相匹其名既定雖單亦通故韋昭通謂之匹夫匹婦也

吾焉

用此其以賈害也注賈買也音義

焉於虔反賈音古注同

乃獻之

又求其寶劔叔曰是無厭也無厭將及我注將殺我

音義

厭於鹽反下同

遂伐虞公故虞公出奔共池注共池地

名闕音義

共音洪一音恭

○冬齊衛鄭來戰于郎我有辭也

初北戎病齊注在六年諸侯救之鄭公子忽有功焉

齊人餽諸侯使魯次之魯以周班後鄭鄭人怒請師

於齊齊人以衛師助之故不稱侵伐注不稱侵伐而

以戰為文明魯直諸侯曲故言我有辭以禮自釋交

綏而退無敗績音義

綏荀佳反

先書齊衛王爵也注鄭主

兵而序齊衛下者以王爵次之也春秋所以見魯猶

秉周禮音義

見賢疏

注正義曰傳言先書齊衛則齊衛不合先書當先書鄭也春秋

之例主兵者先書此則鄭人主兵鄭宜在先而先序齊衛者王爵齊衛為侯尊于鄭伯故以王爵尊卑為序也不依主兵之例而以王爵序者魯班諸侯之成以王爵為次鄭忽負功懷怒致有此師故特改常例

還以王爵次之見  
魯猶秉周禮故也

經十有一年春正月齊人衛人鄭人盟于惡曹注惡曹地闕

夏五月癸未鄭伯寤生卒注同盟于元年赴以名

秋七月葬鄭莊公注無傳三月而塋速

九月宋人執鄭祭仲注祭氏仲名不稱行人聽迫脅以

逐君罪之也行人例在襄十一年釋例詳之音義

聽吐定反

疏注正義曰莊二十五年陳侯使女叔來聘傳曰嘉之故不名是諸侯之卿嘉之乃不名則於法當書名祭

仲行無可嘉知仲非其字故云祭氏仲名也祭仲鄭鄉而至宋見執必是行至宋也行使被執例稱行人此當云執鄭行人而不稱行人者聽宋迫脅以逐出其君罪之故不稱行人昭八年楚人執陳行人于徵師殺之傳曰罪不在行人也以罪不在則稱行人知祭仲罪在其身故去行人也釋例曰祭仲之如宋非會非聘與于見誘而以行人應命不能死節挾偽以篡其君故經不稱行人以罪之是說罪仲之意襄十一年楚人執鄭行人良霄傳曰書曰行人言使人也是變例也傳稱誘祭仲而執之則本非行人故經不言杜必知以行人應命罪之故不稱行人者祭仲若不至宋宋人何得執之既往至宋即是因事而行亦既因事而行便為使人之例杜以傳文稱誘故序其本意言非聘非會聽宋迫脅故不稱行人罪之經與齊人執鄭詹文亦何異劉君以祭仲是字鄭人嘉之妄規杜氏就如劉言既云罪其逐君何以嘉而稱字杜以蕭叔非字故知祭仲是名仲既書名

為罪則不稱行人是其貶責劉云祭仲本非行人未知有何所據

**突歸于鄭**注突厲公

也為宋所納故曰歸例在成十八年不稱公子從告也

文連祭仲故不言鄭疏

注正義曰成十八年傳例曰諸侯納之曰歸知此為宋所納故

曰歸也突實公子而不稱公子傳無褒貶之例知從告者之辭告者不言公子故不稱也十五年許叔入于許

十七年蔡季歸于蔡皆以字繫國突不繫鄭者以文連祭仲祭仲之上已有鄭字蒙上鄭文故不言鄭也以宋人執仲納突乃是一事連書故突得蒙上鄭忽出奔衛文其鄭忽奔衛則鄭人別告故不連上文

**鄭忽出奔衛**

注正義曰僖九年傳曰宋桓公卒未葬而襄公會諸侯故曰子里克殺奚齊于次書曰殺其君之子未葬也彼

以未葬故繫父知既葬則成君此莊公既葬則忽成君矣宜書鄭伯出奔今書忽之名知鄭人賤之以名赴也其賤之意說在忽之復歸

柔會宋公陳侯蔡叔盟于折注無傳柔魯大夫未賜族

者蔡叔蔡大夫叔名也折地闕音義

折之謁反疏注正又市列反義曰

以柔不稱族與無駭相類是無族可稱知其未賜族也亦以蔡叔無善可嘉知叔是名叔亦無族蓋亦未賜族也

公會宋公于夫鍾注無傳夫鍾邾地音義

夫音扶

冬十有

二月公會宋公于闕注無傳闕魯地在東平須昌縣東



南音義

開口暫反  
須宣踰反

傳十一年春齊衛鄭宋盟于惡曹注宋不書經闕疏

注正義曰丘明作傳本以解經經傳不同皆傳是其  
實今傳有宋而經無宋知是經之闕文宋為大國傳  
處鄭下是史文舊闕傳先舉經之所有乃以闕者實  
之故後言宋耳非謂盟之序列宋在下也服虔以為  
不書宋宋後盟宋若後盟盟本無宋傳不得言齊衛  
鄭宋為此盟也傳之上下例不虛舉經文舉此盟者  
為經闕  
宋故也 ○楚屈瑕將盟貳軫注貳軫二國名音義  
居屈

勿反楚大夫氏貳音  
二軫之忍反皆國名  
鄢人軍於蒲騷將與隨絞州蓼

伐楚師注鄢國在江夏雲杜縣東南有鄢城蒲騷鄢

邑絞國名州國在南郡華容縣東南蓼國今義陽棘

陽縣東南湖陽城音義

鄭音云國名騷音蕭又音綮絞古卯反蓼音了本或作鄆

同隨絞州蓼四國名夏戶雅反鄆本亦作涓音云棘紀力反湖音胡

莫敖患之注莫敖

楚官名即屈瑕音義

敖五反

關廉曰鄆人軍其郊必不

誠且日虞四邑之至也注虞度也四邑隨絞州蓼也

邑亦國也音義

且日人逸反度待洛反

疏

注正義曰書云欲宅洛邑傳每云敝邑是

也

君次於郊鄆以禦四邑注君謂屈瑕也郊鄆楚地

音義

鄆以井反疏注正義曰禮坊記云禮君不稱天又以政反疏大夫不稱君恐民之惑也然則大

夫不得稱君此謂屈瑕為君者楚僭王號縣令稱公故呼卿為君大夫正法當呼為主昭元年傳晉和謂趙文子曰主相晉國是其事也祁盈之臣謂祁盈為君伯有之臣謂伯有為公是家臣稱其主耳

我

以銳師宵加於鄆鄆有虞心而恃其城注恃近其城

音義

近附近

疏

正義曰鄆人曰虞四邑之至冀其與已合勢有虞度外援之心而又自恃

近城故無闕志

莫有闕志若敗鄆師四邑必離莫敖曰盍請

濟師於王注盍何不也濟盍也音義

盍戶各反濟箋計反

對曰

師克在和不在衆商周之不敌君之所聞也注商紂

也周武王也傳曰武王有亂臣十人紂有億兆夷人

音義

億於力反

疏

注正義曰古文尚書泰誓曰受有億兆夷人離心離德

予有亂臣十人同心同

德昭二十四年傳引之云亦有離德已與本小殊此

注改予為武王又倒其先後者便文耳雖言傳曰非

傳本文劉炫云欲以證商周之不敵故先少而後多非便文

成軍以出又何濟焉

莫敖曰卜之對曰卜以決疑不疑何卜遂敗鄖師於

蒲騷卒盟而還注卒盟貳軫○鄭昭公之敗北戎也

注在六年齊人將妻之昭公辭祭仲曰必取之君多

內寵子無大援將不立三公子皆君也注子突子亶

子儀之母皆有寵音義

妻七計反下注同援於眷反亶亡匪反本或作亶

弗

從○夏鄭莊公卒初祭封人仲足有寵於莊公注祭

鄭地陳留長垣縣東北有祭城封人守封疆者因以

所守為氏音義

疆居良反

莊公使為卿為公娶鄧曼生昭

公故祭仲立之注曼鄧姓音義

為公于偽反曼音萬

宋雍氏女

於鄭莊公曰雍姑生厲公注雍氏姑姓宋大夫也以

女妻人曰女音義

雍於恭反女尼據反注曰女同姑其吉反又其扶反

雍氏宗

有寵於宋莊公故誘祭仲而執之注祭仲之如宋非

會非聘見誘而以行人應命音義

應應對之應

疏注正義曰傳言

誘而執之則祭仲被誘如宋在宋見執執不在會知  
非會也被誘而往知非聘也直為見誘而以行人應  
彼宋命也行人謂行往宋耳劉炫云杜  
欲成不稱行人之義故以行人言之  
曰不立突將

死亦執厲公而求賂焉祭仲與宋人盟以厲公歸而  
立之○秋九月丁亥昭公奔衛己亥厲公立

經十有二年春正月

夏六月壬寅公會杞侯莒子盟於曲池注曲池魯地魯

國汶陽縣北有曲水亭音義

汶音問

秋七月丁亥公會宋公燕人盟于穀丘注穀丘宋地燕

人南燕大夫

八月壬辰陳侯躍卒注無傳厲公也十一年與魯大夫

盟于折不書葬魯不會也壬辰七月二十三日書於八

月從赴音義

躍羊疏注正義曰躍為厲公世本文也莊略反疏二十二年傳曰陳厲公蔡出也故

蔡人殺五父而立之五父即佗六年殺佗而厲公立也  
陳世家以佗與五父為二人言蔡人為佗殺五父及桓  
公太子免而立佗是為厲公立七年太子免之三弟躍  
林杵臼共弑厲公而躍立是為利公利公立五月卒林  
立是為莊公案傳五父佗一人而世家以為二人案經  
蔡人殺佗在桓公卒之明年不得為佗立七年也佗以  
六年見殺躍以此年始卒不得為躍立五月也既以佗  
為厲公又妄稱躍為利公世本本無利公皆是馬遷妄

說東晉言馬遷分一人以為兩人以無為有謂此事也  
壬辰是七月二十三日上有七月書於八月之下如此  
類者注皆謂之日誤今云從赴者以其終不可通蓋欲  
兩解故也以五年正月甲戌己丑陳侯鮑卒甲戌非正  
月之日而以正月起文傳言再赴是赴以正月也彼以  
十二月之日為正月赴魯知赴者或有以前月之日從  
後月而赴故因  
此以示別意

公會宋公于虛注虛宋地音義

虛去  
魚反

冬十有一月公會宋公于龜注龜宋地

丙戌公會鄭伯盟于武父注武父鄭地陳留濟陽縣東

北有武父城音義

父音甫地名有父  
字者皆同甫音



丙戌衛侯晉卒注無傳重書丙戌非義例因史成文也

未同盟而赴以名音義

重直用反下同

疏

注正義曰春秋之中唯此重書日其餘亦

應有一日兩事各書日者但更無其日不可復知計赴告之體本應皆以日告史官書策復應各書其日但他國之告或有詳畧魯史記注多違舊章致使日與不日無復定準及其仲尼書經不以日月褒貶或畧或詳非此所急故日月詳略皆依舊文此重書丙戌非是義例以舊史所重故因史成文耳

十有二月及鄭師伐宋丁未戰于宋注既書伐宋又重

書戰者以見宋之無信也莊十一年傳例曰皆陳曰戰

尤其無信故以獨戰為文音義

見賢遍反疏注正義曰陳直覲反春秋之例

戰不言伐以其伐可知故略其文也伐者討有罪之辭  
言戰又言伐者皆是罪彼所伐之國此既書伐宋又重  
書戰者以見宋之無信言以鐘鼓聲其罪而伐之彼不  
服罪而反與我戰所以深責之也莊二十八年齊人伐  
衛衛人及齊人戰此文亦當如彼宜云及宋人戰今直  
言戰于宋者尤其無信故以獨戰為文皆陳曰戰戰是  
敵辭不言及宋戰不使宋得敵也十年郎之戰我有禮  
彼無禮齊鄭無辭以罪我不令我與彼敵彼自獨戰為  
文此戰我有信而宋無信我有辭以責宋不使宋敢敵  
我我自獨戰為文郎戰我有辭故言戰不言伐此戰宋  
無辭故言伐不言與宋戰二者雖文皆獨戰  
而義存彼此俱是善惡有殊不得相敵故也

傳十二年夏盟于曲池平杞莒也注隱四年莒人伐  
杞自是遂不平○公欲平宋鄭秋公及宋公盟于句

瀆之丘注句瀆之丘即穀丘也宋以立厲公故多責

賂於鄭鄭人不堪故不平音義

句古侯反  
瀆音豆

宋成未可

知也故又會于虛冬又會于龜宋公辭平故與鄭伯

盟于武父注宋公貪鄭賂故與公三會而卒辭不與

鄭平遂帥師而伐宋戰焉宋無信也君子曰苟信不

繼盟無益也詩云君子屢盟亂是用長無信也注詩

小雅言無信故數盟數盟則情疏情疏而憾結故云

長亂音義

屢力具反本又作婁音同長丁丈  
反注同數音翔下同憾戶暗反

○楚伐

絞軍其南門莫敖屈瑕曰絞小而輕輕則寡謀請無

扞采樵者以誘之注扞衛也樵薪也音義

輕遣政反扞戶旦反

樵在遙反從之絞人獲三十人注獲楚人也明日絞人爭

出驅楚役徒於山中楚人坐其北門而覆諸山下注

坐猶守也覆設伏兵而待之音義

覆扶又反注同

大敗之為

城下之盟而還注城下盟諸侯所深耻疏

注正義曰宣十五年

楚圖宋傳稱華元謂子反曰敝邑易子而食析骸以  
爨雖然城下之盟有以國斃不能從也寧以國斃不  
肯從城下之盟是其深耻也必為深耻者諸侯當好  
事四鄰以衛社稷相時而動量力而行今乃構怨疆

敵兵臨城下力屈勢沮求服受盟是其不知之甚將為鄰國所笑故深耻之

伐絞之役楚

師分涉於彭注彭水在新城昌魏縣疏

注正義曰釋例云彭水出

新城昌魏縣東北至南鄉筑陽縣入漢

羅人欲伐之使伯嘉謀之三巡

數之注羅熊姓國在宜城縣西山中後徙南郡枝江

縣伯嘉羅大夫謀伺也巡徧也音義

謀徒協反數色主反枝質而反

伺音竒徧音遍

疏注正義曰羅熊姓世本文也謀說文云軍中反間也謂詐為敵國之人入其軍中伺

候間隙以反報其主故此訓謀為伺而兵書謂之反間也巡徧也謂巡徧行之

經十有三年春二月公會紀侯鄭伯己巳及齊侯宋公

衛侯燕人戰齊師宋師衛師燕師敗績注大崩曰敗績

例在莊十一年或稱人或稱師史異辭也衛宣公未葬

惠公稱侯以接鄰國非禮也疏

正義曰傳稱宋多責賂於鄭故以紀魯及齊與

宋衛燕戰然則此戰之興本由宋鄭相怨雖復名連同好當以宋鄭為主其序紀在鄭上宋處齊下者若魯人不與而鄰國自行則以主兵為先若與魯同行魯史所記則當以魯為主不得復先主兵亦既不先主兵即以大小為序故紀先鄭也宋使齊為主猶隱四年州吁伐鄭使宋為主故齊先宋此以公在會故不以主兵為先尊卑為序故紀在鄭先若然莊二十六年會宋人齊人伐徐杜云宋主兵故序齊上彼魯亦在而先主兵者彼是魯之微人所會之國又少此則公自在會及所戰之國歷序又多故不與彼同也戰稱將敗稱師是史策之

常法也。史所以然者，師是將之所帥，戰則舉將為重，敗則羣師盡崩。固當舉師言敗，若其敗還書將，則是將身獨敗，無以見師之大崩。故戰則稱將敗，則稱師言其衆師盡敗，非獨將身敗也。此燕人謂將也，楚子傷目，故稱楚子敗績。此若云：燕人敗績，則是燕將身傷，以此不得。不稱師敗，唯莊二十八年衛人敗績，違常文耳。注正義曰：言史異辭者，決莊二十八年衛人及齊人戰，衛人敗績也。此敗稱師而彼敗稱人是史異辭也。史非一人立辭，自異非褒貶之例也。此二者於理則師是而人非，但不以為義，故合各從其本耳。杜以既葬為成君，雖則踰年猶待葬訖，故以惠公為非禮。釋例曰：父雖未葬，喪服在身，踰年則於其國內即位，稱君伐鄭之後，宋公衛侯是也。春秋書魯事，皆踰年即位，稱公不可曠年無君，則知他國亦同。然據父未葬於其國內，雖得伸其尊，若以接鄰國則違禮失制也。是言先君未葬，則不得稱爵成君以接鄰國也。杜言違禮失制，禮制亦無明文。案文八

年八月天王崩九年春毛伯來求金傳曰不書王命未  
葬也彼以踰年未葬不得稱王命使是其禮制未可以  
此知接鄰國則違禮制也

三月葬衛宣公注無傳

夏大水注無傳

秋七月

冬十月

傳十三年春楚屈瑕伐羅鬬伯比送之還謂其御曰  
莫敖必敗舉趾高心不固矣注趾足也遂見楚子曰



必濟師注難言屈瑕將敗故以益師諷諫音義

見賢通反

濟箋計反難乃旦反諷方鳳反本亦作風

楚子辭焉注不辭其旨故拒之

音義

解戶買反

入告夫人鄧曼鄧曼曰大夫其非衆之謂

注鄧曼楚武王夫人言伯比意不在於益衆也其謂

君撫小民以信訓諸司以德而威莫敖以刑也莫敖

狃於蒲騷之後將自用也注狃怙也蒲騷在十一年

音義

狃女久反怙時世反又時設反

必小羅君若不鎮撫其不設備

乎夫固謂君訓衆而好鎮撫之注撫小民以信也音

義好呼報反  
又如字

召諸司而勸之以令德注訓諸司以德

也見莫敖而告諸天之不假易也注諸之也言天不

借貸慢易之人威莫敖以刑也音義

易以政反注同借子夜反貸他

代反慢  
武諫反

不然夫豈不知楚師之盡行也楚子使賴人

追之不及注賴國在義陽隨縣賴人仕於楚者音義

盡津忍反此

疏正義曰大夫伯比言濟衆者非益衆之謂也其此伯比之意當謂君宜撫

慰小人士卒以言信也教訓諸司長率以令德而威

懼莫敖以刑罰也莫敖狃於蒲騷之役狃貫也貫於

蒲騷之得勝遂恃勝以為常將自用其心不受規諫  
必輕小羅國以為無能君若不以言辭刑罰鎮重撫

慰之莫教其將不設備乎夫謂伯比之意固當謂君  
教訓衆民而好以言辭鎮撫之召軍之諸司而勸勉  
之以善德見莫教而告之道上天之意不借貸慢易  
之人不使慢易之人得勝言其必湏敬懼也其意當  
如此耳若其不然此伯比豈不知楚師之盡行也而  
更請益師乎注正義曰說文云狃狎也怙習也郭璞  
云貫怙也今俗語皆然則狃怙皆貫習之義以  
貫得勝則輕易前敵將自用其意不復持重

莫教

使徇于師曰諫者有刑注徇宣令也音義

徇似反

及鄢

亂次以濟注鄢水在襄陽宜城縣入漢音義

鄢於晚反又於

萬反亂次以濟本或作亂次以濟其水

疏

注正義曰釋例云鄢水出新  
城沔鄉縣東南經襄陽至宜

城縣入漢

遂無次且不設備及羅羅與盧戎兩軍之注盧

戎南蠻音義

盧如字本或作盧音同

大敗之莫敖縊於荒谷羣

臣囚于冶父以聽刑注縊自經也荒谷冶父皆楚地

音義

縊一鼓反荒如字本或作荒音同冶音也

楚子曰孤之罪也皆免之

○宋多責賂於鄭注立突賂鄭不堪命故以紀魯及

齊與宋衛燕戰不書所戰後也注公後地期不及其

戰故不書所戰之地疏

注正義曰兩敵將戰必豫期戰地公未見紀鄭紀鄭已與

齊宋先設戰期公不及設期唯及其戰故言戰而不書所戰之地言此地非公所期故不書也釋例曰桓十三年戰不書所者期戰所在之地也公會戰而後其期猶及諸侯共其成敗故備書諸國而不書地

成十六年傳曰戰之日齊國佐至於師此其類也然則諸戰書日者日即從月計此經當云二月己巳公會紀侯鄭伯今退己巳於鄭伯之下者春秋之例公之出會例多以月要盟戰敗例多以日故己巳之文在公會紀侯鄭伯之下十二年十二月及鄭師伐宋丁未戰于宋亦其類也服虔云下日者公至而後定戰日地之與日當時設期公既不及期地安得及期日也劉炫云公會紀鄭告廟而行始行即書會也其戰之日則戰罷乃告廟史官雖連并其文而存其本旨己巳是戰日故下日以附戰

○鄭人

來請脩好音義

好呼報反

經十有四年春正月公會鄭伯于曹注脩十二年武父

之好以曹地與會音義

好呼報反與音預

無冰注無傳書時失

夏五注不書月闕文鄭伯使其弟語來盟

秋八月壬申御廩災注御廩公所親耕以奉粢盛之倉

也天火曰災例在宣十六年音義

廩力錦疏注正義曰反倉也

傳稱御廩

災乙亥嘗書不害也明嘗之所用是御廩之所藏也禮記祭義云天子為籍千畝諸侯百畝躬秉耒以事天地山川社稷先古敬之至也穀梁傳曰天子親耕以共粢盛王后親蠶以共祭服國非無良農工女也以為人之所盡事其祖禰不若以己所自親者也月令季秋乃命冢宰藏帝籍之収於神倉鄭玄云重粢盛之委也帝籍所耕千畝也藏祭祀之穀故為神倉以此諸文知御廩藏公所親耕以奉粢盛之倉也廩即倉之別名周禮廩

人為倉人之長其職曰大祭祀則共其接盛鄭玄云接讀為扱扱以授春人大祭祀之穀籍田之收藏於神倉者不以給小用是公所親耕之粟擬共祭祀藏於倉廩故謂之御廩災其屋而不損其穀故書曰不害也

乙

亥嘗注先其時亦過也既戒日致齊廩雖災苟不害嘉

穀則祭不應廢故書以示法音義

先悲薦反又如字齊側皆反

疏

注正

義曰八月建未未是始殺故云先其時亦過也周禮大宰祀五帝前期十日帥執事而卜日遂戒享先王亦如之鄭玄云十日者容散齊七日致齊三日壬申在乙亥之前三日是致齊之初日也既已戒日致齊御廩雖災苟其不害嘉穀有穀可以共祭祀則祭不應廢故書以示法也若害穀則當廢不可苟用他穀故也先時亦過過則當書但書過已有成例故傳指言不害故沈氏云杜以先時亦過過則當書傳何以專言不害此立明之

意若非先時有災不害亦書若非御廩有災先時亦書  
進退明例也服虔云魯以壬申被災至乙亥而嘗不以  
災害為恐故衛難杜云若救之則息不害嘉穀則傳當  
有救火之文若如宋災傳舉救火今直言不害朋知不  
以災為害杜必為不害嘉穀者秦氏答云傳所以不載  
救火者傳以指釋經文略舉其要所以不載救火至於  
宋鄭之災彼由簡牘備載  
詳略不等不可相難也

冬十有二月丁巳齊侯祿父卒注無傳隱六年盟於艾  
宋人以齊人蔡人衛人陳人伐鄭注凡師能左右之曰  
以例在僖二十六年

傳十四年春會于曹曹人致餼禮也注熟曰饗生曰



餼疏

注正義曰周禮外內饗皆掌割烹之事亨人職外內饗之饗亨煮饗者煮肉之名知熟曰饗

二十四年傳稱晉人餼臧石牛以生牛賜之知生曰饗又聘禮致饗餼五牢飪一牢腥二牢餼二牢飪是熟肉腥是生肉知餼是未殺鄭玄以為生牲曰餼唯瓠葉箋云腥曰餼欲以牽為牽行故餼為已殺非定鮮也定鮮猶以生為餼傳諸言餼者皆致生物於賓也

○夏鄭子人來尋盟且

脩曹之會注子人即弟語也其後為子人氏○秋八

月壬申御廩災乙亥嘗書不害也注災其屋救之則

息不及穀故曰書不害○冬宋人以諸侯伐鄭報宋

之戰也注在十二年焚渠門入及大逵注渠門鄭城

門達道方九軌音義達求龜反伐東郊取牛首注東郊鄭

郊牛首鄭邑以大宮之椽歸為盧門之椽注大宮鄭

祖廟盧門宋城門告伐而不告入取故不書音義大音

泰椽直專反椽也圓曰椽方曰桷說文云周謂之椽齊魯謂之桷

經十有五年春二月天王使家父來求車

三月乙未天王崩注無傳桓王也

夏四月己巳葬齊僖公注無傳

五月鄭伯突出奔蔡注突既篡立權不足以自固又不

能倚任祭仲反與小臣造賊盜之計故以自奔為文罪

之也例在昭三年音義

倚於疏注正義曰凡諸侯出奔綺反疏皆被逐而出非自出也

舊史書臣以逐君仲尼脩春秋責其不能自固皆以自奔為文以故此注述突之惡言其罪之之意釋例曰諸侯奔亡皆迫逐而苟免非自出也傳稱衛孫林父甯殖出其君名在諸侯之策此以臣名赴告之文也仲尼之經更沒逐者主名以自奔為文責其不能自安自固所犯非徒所逐之臣也言其所犯處多非徒逐者獨惡君不能君故臣亦不臣臣之逐君其罪已著沒其臣名獨見君罪言罪不純在其臣故也衛獻公出奔不名鄭伯突及北燕伯款蔡侯朱等皆書名者從彼告辭故釋例曰衛赴不以名而燕赴以名隨赴而書之義在彼不在此也言責其不能自安自固自奔即是身罪名與不名不復著義故從告也昭三年傳曰書曰北燕伯款出奔

齊罪之也  
是變例也

鄭世子忽復歸于鄭注忽實居君位故今還

以復其位之例為文也稱世子者忽為太子有母氏之  
寵宗卿之援有功於諸侯此太子之盛者也而守介節  
以失大國之助知三公子之彊不從祭仲之言修小善  
絜小行從匹夫之仁忘社稷之大計故君子謂之善自  
為謀言不能謀國也父卒而不能自君鄭人亦不君之  
出則降名以赴入則逆以太子之禮始於見逐終於見  
殺三公子更立亂鄭國者實忽之由復歸例在成十八

年音義

介音界行下疏注正義曰成十八年傳曰復其  
孟反更音庚疏位曰復歸忽本既居君位然後

出奔故今還以復位之例為文也經言復歸朋是復位  
之例注言此者以忽之出奔不稱鄭伯歸言世子又非  
君號非君而稱復歸嫌其不是復位故朋之禮父在稱  
世子忽父之喪於今五年世子非所當稱故迹其稱之  
意鄭曼所生立為世子是有母氏之寵也宗卿謂同姓  
之卿祭仲之女曰雍姬則祭仲姬姓是同宗卿也救齊  
敗戎是有功也而守介節謂守瑣瑣狷介之節不娶齊  
女也經書鄭忽出奔不稱鄭伯是降名以赴也今稱世  
子復歸是逆以大子之禮也逆以大子之禮者以突是  
庶子無道出奔更欲擇君莫踰於忽以本是世子故迎  
之使還為是世子所以得歸鄭以世子名告不以黨為  
君告時史因其告辭書曰世子實復本位書曰復歸而  
忽之為君不能自固始於見逐終於見殺三公子更立  
為君亂鄭國者實忽之由釋例與此注盡同其末云故

仲尼因以示義言因舊史之文即稱世子示鄭人本有不以為君之義忽於隱公之世每稱公子六年稱大子則救齊之時已立為大子故也

許叔入于許注許叔莊公弟也隱十一年鄭使許大夫

奉許叔居許東偏鄭莊公既卒乃入居位許人嘉之以

字告也叔本不去國雖稱入非國逆例疏

注正義曰入者自外之辭

本其所自之處言其自許東偏而入于許國非從外國入也鄭莊公以十一年卒許叔今始入者蓋鄭突不使其復忽既得位親仁善鄰存許以德許人冀其為己之援故此年始得入也小白陽生入皆稱名此叔稱字故云許人嘉之以字告也杜知是字者以蔡季子來歸亦以書字故知之也杜以傳例云凡去其國國逆而立之

曰入嫌此亦為國逆之例釋例曰諸在外例稱入直是自外入內記事常辭義無所取賈氏雖夫人姜氏之入皆以為例由先儒以為國逆故言許叔本不去國非國逆之正例國逆正例據去國而來許叔本非去國故云非國逆例其實許始復國許叔得還上下交歡同心迎逆指其實事有國逆之理故於釋例云許叔有國逆之文但非國逆正例耳劉君不達此旨妄規杜失非也

### 公會齊侯于艾

邾人牟人葛人來朝注無傳三人皆附庸之世子也其

君應稱名故其子降稱人牟國今泰山牟縣葛國在梁

國寧陵縣東北音義

牟亡疏注正義曰三國俱稱人合侯反疏行禮知其尊卑同也以邾

子未得王命知年當之等是附庸鄭黎來來朝附庸書  
名此若君自親來則亦應稱名若遣臣來聘又不得稱  
朝曹伯使世子射姑來朝是世子有稱朝之義知此三  
人皆附庸世子攝行父事而來朝也諸侯之卿稱名大  
夫降稱人是人之於名例差一等若附庸其君應稱名  
故其子降稱人釋例曰王之世子不名諸侯世子則名  
會王世子于首止曹世子射姑來朝是也附庸世子稱  
人邾人牟人當人來朝是也是言世子稱謂之等級也  
地理志泰山郡牟縣故牟國也陳留郡寧陵  
縣應劭曰故葛伯國然則於晉屬梁國也

秋九月鄭伯突入于櫟注櫟鄭別都也今河南陽翟縣

未得國直書入無義例也音義

櫟音歷翟徒歷反

冬十有一月公會宋公衛侯陳侯于袤伐鄭注袤宋地



在沛國相縣西南先行會禮而後伐也音義

袁昌氏反相息亮反

疏注正義曰知非不與謀言會者以言于袁故知此行會禮也若不言地直言會則是不與謀例也召陵會

杜注云於召陵先行會禮與此同也

傳十五年春天王使家父來求車非禮也諸侯不貢

車服注車服上之所以賜下天子不私求財注諸侯

有常職貢○祭仲專鄭伯患之使其壻雍糾殺之將

享諸郊雍姬知之謂其母曰父與夫孰親其母曰人

盡夫也父一而已胡可比也注婦人在室則天父出

則天夫女以為疑故母以所生為本解之遂告祭仲

曰雍氏舍其室而將享子於郊吾惑之以告祭仲殺

雍糾尸諸周氏之汪汪汪池也周氏鄭大夫殺而暴

其尸以示戮也音義

舍音捨汪烏黃反暴步卜反

公載以出注愍

其見殺故載其尸共出國曰謀及婦人宜其死也○

夏厲公出奔蔡○六月乙亥昭公入○許叔入于許

○公會齊侯于艾謀定許也○秋鄭伯因櫟人殺檀

伯而遂居櫟注檀伯鄭守櫟大夫音義

檀徒丹反

○冬會

于袞謀伐鄭將納厲公也弗克而還

經十有六年春正月公會宋公蔡侯衛侯于曹

夏四月公會宋公衛侯陳侯蔡侯伐鄭注春既謀之今

書會者魯諱議納不正蔡常在衛上今序陳下蓋後至

疏注正義曰宣七年傳例云與謀曰及不與謀曰會此

春既謀之例當言及今書會者魯諱與諸侯聚議納

不正之人故從不與謀之文釋例曰魯既春會于曹以

謀伐鄭夏遂興師而更從不與謀之文者厲公篡天子

忽之位謀而納之非正故諱之從不與謀之例是其義

也諸侯之序以大小為次班序譜稱自隱至莊十四年

四十三歲征伐盟會者凡十六國時無霸主會同不并

無有成序其間蔡與衛凡七會六在衛上唯此處在陳

下故以為  
蓋後至也

秋七月公至自伐鄭注用飲至之禮故書

冬城向注傳曰書時也而下有十一月舊說因謂傳誤  
此城向亦俱是十一月但本事異各隨本而書之耳經  
書夏叔弓如滕五月葬滕成公傳云五月叔弓如滕即  
知但稱時者未必與下月異也又推校此年閏在六月  
則月却而節前水星可在十一月而正也詩云定之方  
中作于楚宮此未正中也功役之事皆總指天象不與

言歷數同也故傳之釋經皆通言一時不月別音義

向失

亮反定疏

注正義曰杜以城向與下同月故檢叔弓如

丁倭反

滕經傳之異如滕與葵同月知此城向與出

奔同月但本事既異各隨本而書之下有月而此無月耳其實同是十一月也但十一月水星昏猶未正故復

推校歷數此年月却節前水星可在十一月而正又方者未至之辭故以定之方中為方欲向中而實未正中

十一月可以興土功書時非傳誤也劉炫規過以為案周語云辰角見而雨畢天根見而水涸駟見而隕霜火

見而清風戒寒故先王之教曰雨畢而除道水涸而成梁隕霜而冬裘具清風至而修城郭故夏令曰九月除

道十月成梁營室之中土功其始先儒以為建成之中霜始降房星見霜降之後寒風至而心星見鄭玄云辰

角見謂九月本天根見謂九月末天根謂氐星是也自然火見是建亥之月又春秋城楚丘是正月而杜引詩

云定之方中未正中也定星豈正月未正中乎據此諸文則火見土功必在建亥之月則建戌之中必無土功之理而杜以為建戌之月得城向者非也今以為周語之文單子見陳不除道故譏為此言故所舉時節並在早月也月令孟冬天子始裘單子云隕霜而冬裘具九月已裘是其早也且周語之文據尋常節氣九月而除道十月而興土功杜以此年閏在六月則建戌之月二十一日已得建亥節氣是十月節氣在九月之中土功之事何為不可諸侯城楚丘自在正月衛人初作宮室必在其前杜云定星方欲正中於理何失劉君廣引周語之文以規杜杜以月却節前何湏致難

十有一月衛侯朔出奔齊注惠公也朔讒構取國故不

言二公子逐罪之也

傳十六年春正月會于曹謀伐鄭也注前年冬謀納

厲公不克故復更謀音義

復扶又反

○夏伐鄭秋七月公

至自伐鄭以飲至之禮也○冬城向書時也○初衛

宣公烝於夷姜生急子注夷姜宣公之庶母也上淫

曰烝音義

烝之承反急如字詩作烝上時掌反一音如字

疏

注正義曰晉獻公烝於齊姜惠

公烝於賈君皆是淫父之妾知此亦父妾故云庶母也成二年傳稱楚莊王以夏姬子連尹襄老襄老死其子黑要烝焉淫母而謂之烝知烝是上淫蓋訓烝為進言自進與之淫也世家云初宣公愛夫人夷姜烝淫而謂之夫人馬遷謬耳

屬諸右公子為之娶於齊而美公取

之生壽及朔屬壽於左公子注左右媵之子因以為

號音義

屬音燭下同為于  
偽反媵羊政反

疏注正義曰公子法無左  
右明其因母為號公羊

稱諸侯取一國則二國往媵之以有二媵故分為左  
右說公羊者言右媵貴於左媵義或當然此左右公  
子蓋宣公  
之兄弟也夷姜縊注失寵而自縊死宣姜與公子朔

構急子注宣姜宣公所取急子之妻構會其過惡音

義

構古豆反  
會古外反

公使諸齊使盜待諸莘將殺之注莘衛

地陽平縣西北有莘亭音義

公使所吏反  
莘所中反

壽子告之

使行注行去也不可曰棄父之命惡用子矣注惡安



也音義

惡音烏注同

有無父之國則可也及行飲以酒壽

子載其旌以先盜殺之急子至曰我之求也此何罪

請殺我乎又殺之二公子故怨惠公十一月左公子

洩右公子職立公子黔牟注黔牟羣公子音義

飲以酒於

鶴反一本以作之洩息

疏正義曰代之而載其旌盖列反黔其廡反又音琴

旌有識故也世家云與大子白旄而告盜曰見白旄者殺之或當以白旄為旌但馬遷演此文而為之說其辭至鄙未必其言可信

也

惠公奔齊

經十有七年春正月丙辰公會齊侯紀侯盟于黃注黃

齊地

二月丙午公會邾儀父盟于趯注趯魯地稱字義與蔑

盟同二月無丙午丙午三月四日也日月必有誤音義

趯翠  
軌反

夏五月丙午及齊師戰于奚注奚魯地皆陳曰戰音義

陳直  
覲反

六月丁丑蔡侯封人卒注十一年大夫盟于折

秋八月蔡季自陳歸于蔡注季蔡侯弟也言歸為陳所

納

癸巳葬蔡桓侯注無傳稱侯蓋謬誤三月而葬速疏

正注

義曰五等諸侯卒則各書其爵葬則舉諡稱公禮之常也此無貶責而獨稱侯故云蓋謬誤也釋例曰卒而外赴者皆主爵而稱名慎死考終不敢違大典也書葬者皆從主人私稱客主之人敬各有本謙敬各得其所而後二國之禮成也葬蔡桓侯獨不稱公劉賈許曰桓卒而季歸無臣子之辭也蔡侯無子以弟承位羣臣無廢主杜稷不乏祀故傳稱蔡人嘉之非貶所也杞伯稱子傳為三發蔡侯有貶傳亦宜說史書謬誤疑有闕文是其疑之意也

及宋人衛人伐邾

冬十月朔日有食之注甲乙者歷之紀也晦朔者日月之會也日食不可以不存晦朔晦朔須甲乙而可推故日食必以書朔日為例

傳十七年春盟于黃平齊紀且謀衛故也注齊欲滅紀衛逐其君○及邾儀父盟于趙尋蔑之盟也注蔑盟在隱元年○夏及齊師戰于奚疆事也注爭疆界也音義疆居良反注及下皆同於是齊人侵魯疆疆吏來告公

曰疆場之事慎守其一而備其不虞注虞度也不度

猶不意也音義

場音亦度待洛反下同

疏正義曰疆場謂界畔也至此易主故名曰

場典封疆者不得已往使人無使人來侵已謹慎守其一家之所有以備不意度之事

姑盡所

備焉事至而戰又何謁焉注齊背盟而來公以信待

故不書侵伐音義

背音佩下同

○蔡桓侯卒蔡人召蔡季

于陳注桓侯無子故召季而立之季內得國人之望

外有諸侯之助故書字以善得衆稱歸以明外納○

秋蔡季自陳歸于蔡蔡人嘉之也注嘉之故以字書

○伐邾宋志也注邾宋爭疆魯從宋志背趙之盟○

冬十月朔日有食之不書日官失之也天子有日官

諸侯有日御注日官日御典歷數者日官居卿以底

日禮也注日官天子掌歷者不在六卿之數而位從

卿故言居卿也底平也謂平歷數音義

底音旨下同

疏注

義曰周禮大史掌正歲年以序事頒告朔于邦國然則天子掌歷者謂大史也大史下大夫非卿故不在六卿之數傳言居卿則是尊之若卿故知非卿而位從卿故言居卿也平歷數者謂掌作歷數平其遲速而頒于邦國也晦朔弦望交會如期日月五星行道有度歷而數之故曰歷數也

日御不失

日以授百官于朝注日官平歷以班諸侯諸侯奉之

不失天時以授百官○初鄭伯將以高渠彌為卿昭公惡之固諫不聽昭公立懼其殺己也辛卯殺昭公

而立公子亶注公子亶昭公弟

音義惡烏路反下及注所惡皆同亶

音尾君子謂昭公知所惡矣公子達注魯大

夫疏

正義曰弑君者人臣之極惡也昭公惡其人其

人果行大惡是昭公知所惡矣言昭公惡之不

妄也韓子以為君子言知所惡者非多其知之名而

嫌其心不斷也曰知之若是其明也而不予早誅焉

以及於死故言知所惡以見其無權也昭公知其惡

而不能行其誅致使渠彌含憎懼死以激幸故昭公

不免於弑戒人君使彊於斷也注正義曰知非鄭人

者若是鄭人當在君子之前言之傳先載君子之議

後陳子達之言是達聞其言而評之與臧文仲聞夢六之滅其事相類故知是魯人也

高伯其

為戮乎復惡已甚矣注復重也本為昭公所惡而復

弑君重為惡也音義

復扶又反注同一音服則垂注意重直用反下同

經十有八年春王正月公會齊侯于濼注濼水在濟南

歷城縣西北入濼音義

濼盧篤反又力角反一音洛說文匹沃反

公與夫人

姜氏遂如齊注公本與夫人俱行至濼公與齊侯行會

禮故先書會濼既會而相隨至齊故曰遂疏

正義曰僖十一年公

及夫人會齊侯于陽穀彼言及此不言及者公羊傳曰公何以不言及夫人夫人外也言夫人淫於齊侯而踈



外公故不言及也穀梁傳曰不言及夫人何也以夫人之伉不稱數也言夫人驕伉不可及故舍而不數也杜無明解傳載申繻之言譏公男女相瀆蓋以相褻瀆之故果致大禍時史譏其男女無別故不書及也注正義曰據傳文知其嚮會之時即與夫人俱行至於樂水之上不言及夫人會者夫人從公行耳其會之時夫人不與既會乃相隨嚮齊故如齊之上加書夫人公自因會而行故言遂耳

夏四月丙子公薨于齊注不言戕諱之也戕例在宣十

八年音義

戕在良反

丁酉公之喪至自齊注無傳告廟也丁

酉五月一日有日而無月

秋七月

冬十有二月己丑葬我君桓公注無傳九月乃葬緩慢也

傳十八年春公將有行遂與姜氏如齊注始議行事

申繻曰女有家男有室無相瀆也謂之有禮易此必

敗注女安夫之家夫安妻之室違此則為瀆今公將

姜氏如齊故知其當致禍亂音義

瀆徒疏正義曰沈本反疏氏云卿大

夫稱家家者內外之大名戶內曰室但男子一家之主職主內外故曰家婦人主閨內之事故為室也劉炫云釋宮云宮謂之室其內謂之家則家之與室義無以異欲見男女之別故以室屬之其實室家同也

公會齊侯于濼遂及文姜如齊齊侯通焉公謫之注

謫譴也音義

謫直草反責也王又  
工草反譴遣戰反

以告注夫人告齊

侯夏四月丙子享公注齊侯為公設享燕之禮音義

為于  
偽反使公子彭生乘公公薨于車注上車曰乘彭生

多力拉公幹而殺之音義

乘如字又純證反注同上  
時掌反拉力荅反幹古旦

反疏

注正義曰莊元年公羊傳曰夫人謂公於齊侯  
齊侯怒與之飲酒於其出焉使公子彭生送之

於其乘焉擗幹而殺之何休云擗折聲也齊世家云  
襄公使力士彭生抱上魯君車因擗殺魯桓公下車

則死矣擗摺  
拉音義同也

魯人告于齊曰寡君畏君之威不敢寧

居來脩舊好禮成而不反無所歸咎惡於諸侯請以

彭生除之注除耻辱之惡也音義

好呼報反咎其九反

齊人殺

彭生注不書非卿○秋齊侯師于首止注陳師首止

討鄭弑君也首止衛地陳留襄邑縣東南有首鄉子

亶會之高渠彌相注不知齊欲討己音義

相息亮反

七月

戊戌齊人殺子亶而輟高渠彌注車裂曰輟音義

輟音

患裂疏

注正義曰襄二十二年傳稱輟觀起於四竟又曰觀起車裂是其事也周禮條狼氏誓僕

右曰殺誓馭曰車輟然則周法有此刑也

祭仲逆鄭子于陳而立之注鄭

子昭公弟子儀也是行也祭仲知之故稱疾不往人

曰祭仲以知免仲曰信也注時人譏祭仲失忠臣之

節仲以子亹為渠彌所立本既不正又不能固位安

民宜其見除故即而然譏者之言以明本意音義知音

智又○周公欲弑莊王而立王子克注莊王桓王太

子王子克莊王弟子儀音義弑申志反辛伯告王遂與王

殺周公黑肩王子克奔燕注辛伯周大夫初子儀有

寵於桓王桓王屬諸周公辛伯諫曰並后注妾如后

音義

屬音燭

匹嫡

注庶如嫡

音義

嫡丁歷反注同

兩政

注臣擅

命

音義

檀布戰反

耦國

注都如國

亂之本也

周公弗從故

及

注及於難也

音義

難乃旦反

春秋左傳注疏卷六

春秋左氏傳注疏卷六考證

穀伯綏來朝鄧侯吾離來朝注穀國在南鄉筑陽縣北

○臣台南

按筑陽漢屬南陽後漢建安十三年曹操

分南陽西界立南鄉郡晉武帝平吳改南鄉郡為順陽郡是以晉志序筑陽於順陽郡之下也或疑南鄉當作南陽者非

傳盟向求成于鄭既而背之疏此盟向之邑必有主據

之○臣浩

按此義注所未言疏補其闕據後襄王以

陽樊子晉倉葛不服知盟向之不服亦必有主據之也

冬十月雨雪注今八月也書失時○臣浩按夏時八月

本不當雨雪故以異常而書於經杜注謂時失專指司天之授時差錯與後傳失閏一例則非也

傳楚子伐隨疏釋例曰漢一名沔水出武都沮縣東經漢中魏興至南陽○魏興訛魏典各本皆然臣召南

按魏文帝分漢中立魏興郡晉因之今依晉志改正



傳王命虢仲立晉哀侯之弟緡于晉○趙汭補注曰陳氏云王命諸侯不書今按王室不以立緡告諸侯晉又不告立君史亦無由得書也

九年冬曹伯使其世子射姑來朝注曹伯有疾故使其子來朝○臣召南按此以十年曹桓公卒故注謂曹

伯有疾也曹伯使世子朝自是非禮故經依實書之若果曹伯有疾則世子聞樂而歎乃人之至情施父何得言非歎所乎臣照按春秋之時強凌弱衆暴寡

之勢寢熾曹伯或有戒心諱其疾之聞于諸侯而使世子來朝世子懷憂故聞樂而歎施父窺其微故曰曹太子其有憂乎非歎所也後儒以樂奏而歎比之執玉高卑其容俯仰之類遂謂施父譏曹太子失歎恐是後儒之誤解也

傳號仲芮伯梁伯荀侯賈伯伐曲沃○

臣召南

按荀賈

二國杜注不言所在按水經注古水西南逕荀城在絳州西十五里後漢郡國志注引博物記河東臨汾

縣有賈鄉賈伯邑

傳虢公出奔虞注虞國在河東大陽縣○臣召南按地

理志河東郡大陽吳山在西上有吳城周武王封泰伯後于此是為虞公為晉所滅大陽監本訛作太陽今改正

傳秦人納芮伯萬于芮注四年圍魏所執者○臣浩按

前年秋傳有芮伯與虢仲梁伯荀侯賈伯同伐曲沃則彼芮伯是國人所立此芮伯乃四年秦圍魏所執

者也

宋人執鄭祭仲注聽迫脅以逐君罪之也○

臣召南按

後漢書賈逵傳逵擿出左氏三十事尤著明者皆君臣之大義父子之紀綱如祭仲之屬左氏義深于君父公羊多任于權變謂此

傳鄖人軍於蒲騷注鄖國在江夏雲杜縣東南有鄖城

○臣召南

按各本俱作雲社非也漢晉志俱作雲杜

故城在今湖廣安陸府今改正

傳關廡曰注四邑隨絞州蓼也○蓼監本訛鄖今改正  
傳鄭伯因櫟人殺檀伯注檀伯鄭守櫟大夫○臣浩按  
五年傳注檀伯即曼伯也

冬城向注此城向亦俱是十一月○啖助曰按下有十  
一月縱是同月亦今之九月農工未畢不可興役趙  
汭補注曰今按土功自戒事至畢功非止一月之事  
故城築皆時而不月

傳齊人殺彭生注不書非卿○陳傅良曰杜氏說非是

殺彭生不書嫌討賊也趙汸曰史既諱戕書薨則殺  
彭必不復書

春秋左氏傳注疏卷六考證

謹按第十二頁後四行疏是說罪仲之意刊本監

本毛本仲訛治據宋本改

第十三頁前六行疏執仲納突諸本突訛屬據宋

本改

後四行音義折之謁反諸本謁訛說據釋文及宋

本改

第三十四頁後七行注十一年諸本一訛三據宋

本改

第三十五頁前六行疏疑有闕文諸本有訛在據

宋本改

第三十八頁後五行注今公將姜氏如齊諸本公


訛云據宋本改

後八行疏則家之與室諸本與訛為據宋本改

第四十頁前二行注時人譏祭仲失忠臣之節諸

本譏訛知據宋本改





覆校官編修臣張永恩

校對官修撰臣張書勲

謄錄監生臣周志禮